


Investigacion andando tocante irregularidad den Stichting Sportsubsidie Aruba



Pagina 3

- **Interupcion di coriente a afecta area di Oranjestad pa mas di cuater ora**

Pagina 2

- **Dos hoben deteni den caso di tiramento cu arma di candela**

Pagina 4

- **Fondo aloca pa ehecuta proyectonan segun landspakket**

Pagina 6

Tin frustracion entre turista pa por drenta Machu Picchu



Pagina 10

Haiti: Incidente diplomatico ta trece dilanti diferencia den gobierno



Pagina 11

Florida bao di estado di emergencia pa motibo di posibel horcan grandi



Pagina 24

BAKI DEN BARIO SANTA CRUZ

28 SEPTEMBER 2024 | VELD DI ARSENAL | 7-11am



Ministerio di Naturalesa

www.limpi.aw

*Limpi
Limpi*

Expo Health & Wellness gratis diadomingo awor pa comunidad di Aruba



Diadomingo 29 di september na Hyatt Place Airport lo tuma lugha e Expo Health & Wellness Aruba unda organisadonan ta bay enfatisa riba e importancia di salud y bienestar pa e comunidad, cu un enfoque special riba prevencion y tratamiento innovador.

Pa esaki, Jenny Montiel ken ta presidente y fundado di Expo Health & Wellness Aruba a seña cu ta bay ta un evento importante pa e comunidad Arubiano mirando cu ta en-

foca riba e salud preventivo cu e presentacion stakeholder di diferente area manera, comercial, fundacionnan, dokternan specialista den wowo y dentista cu ademas ta bay duna charlanan educativo.

Montiel a sigura cu esaki ta un evento gratis unda comunidad ta bonbini pa asina por haci diferente test. Aruba ta conoci pa ta un pais cu tin estadisticanan halto di sobre peso, e causante di diferente malesanan cronico manera hipertension. “Despues cu e malesanan

aki ta drenta na nos curpa, e complicacionnan di salud ta bin cu por tabata reversibel si nos ta cuminsa ataca nan na tempo, pero tambe si nos no ta cuida nos curpa,” el a bisa.

Den su opinion, Montiel ta considera cu hende grandi tin mas riesgo debi cu nan tin un sistema inmunologico debil, su emocionnan no ta ekilibra, un PH desbalansa, no ta bebe awa, ta bebe diferente remedi, e ora ey nan ta sufrir complicacionnan cu pa hopi biaha ta ireversibel.

Den esaki, Montiel tambe a señala cu e poblacion hoben tambe ta sufriendo unda cada dia mas tin mas caso di hende cu depresion y ansiedad, “no tin e cultura cu nos tin cu cuida nos curpa pa por ta un adulto saludabel.”

Fabiola Zambrano ken ta forma parti di e organizacion di e evento aki a sigura cu esaki ta un proyecto cu nan a

trece dilanti mirando cu nan ta personanan cu ta traha den area di salud y nan a uni pa comunidad di Aruba pone mas atencion riba su salud y bienestar.

E expo aki ta bay presenta charlanan educativo cu personanan specialisa, tambe lo tin un area di movecion cu training di diferente gym y lo cuminsa for di 10or di mainta te cu 5or di atardi na Hyatt Place Airport.

“Nos ta motiva hendenan pa ta mas activo y mas saludabel, despues di Covid Aruba ta mas consciente y nos lo sigui haci e tipo di actividadnan aki,” Zambrano a bisa.

Pa finalisa, nan ta spera cu comunidad di Aruba por asisti diadomingo awor pa asina haya mas informacion tanto di personanan specialisa den area di salud y di diferente otro stakeholders enfoca riba e area aki.



Interupcion di coriente a afecta area di Oranjestad pa mas di cuater ora

Diaranson mainta ELMAR N.V. a informa cu nan tabata experienciando un interupcion di coriente cu a afecta area di Socotoro, Madiki y un parti di Oranjestad pa mas di cuater ora.

Pa 7:26 di mainta a traves di nan pagina di Facebook ELMAR N.V. a informa cu nan tabata confrontando un interupcion den e distribucion di coriente den e area mencionada. Mesora e tecnicoonan a yega na e sitio pa atende cu e situacion y averigua kico ta e problema pa soluciona esaki.

Segun e informacion cu nan a brinda e causa tabata un interupcion di suministro riba un kabel bou tera. E tecnicoonan a logra localisa e area specifico di e storing riba e kabel, a cuminsa e proceso pa isla e problema pa nan por cuminsa e trabounan pa reestablece e suministro di coriente.



Poco prome cu 9or di mainta e trabounan di reparacion a cuminsa, ELMAR N.V. a informa, tabata encera un remplazo di un instalacion di coriente di voltahe halto den un casita di coriente y e trabou tabatin un duracion di alrededor di cuater pa cinco ora.

E areanan afecta a keda sin coriente henter parti mainta ya cu pa 1or di atardi techni-

conan a finalisa cu e trabou y a logra reestablece e servicio di coriente na tur cliente afecta pa e problema aki.

Den e ultimo simannan interupcionnan inespera di coriente a disminui den cantidad. Na comienso di aña pa algun luna e interupcionnan tabata basta halto. Pa motibo di e situacion preocupante cu tabatin e momento ey expertonan di MPR a bin Aruba pa haci un investigacion a asina saca afo kico ta e problemanan cardinal, kico ta prioridad y con por soluciona e problema aki y evita interupcionnan di coriente.

Durante e presentacion di e resultadonan di e investigacion, e expertonan di MPR a resalta cu e fayto di ekipo




ta e riesgo mas grandi riesgo cu nan ta mira na e isla pa e interupcionnan y e suministro confiabel di electricidad pa e ciudadanonan.

Nan a remarca cu e realidad ta cu e confiabilidad di e red di electricidad no a deteriora di un dia pa otro y cu lo

tuma tempo pa kibra esaki.

A pesar di e cantidad halto di interupcionnan di coriente, expertonan a demostra tambe cu e interupcionnan di coriente debi na fayto di ekipo a baha di 70% añanan prome pa 50% den 2024, cual ta nifica un reduccion di 20%.



Investigacion andando tocante iregularidad den SSA

Parlamentarionan Tromp, Gunn y Mansur ta pidi reunion publico cu caracter di urgencia

Recientemente den diferente medio di comunicacion a bin dilanti e noticia cu algun persona di Stichting Sportsubsidie Aruba (SSA) a keda suspendi pa motibo di iregularidadnan pa loke ta trata uso di algun fondo. Durante conferencia di prensa ayera mainta, minister demisionario di Enseñansa y Deporte, Endy Croes a elabora riba e tema y a aclaria algun punto.

Segun loke e mandatario a indica, na comienso di e luna aki e presidente di Consejo di Supervision di SSA infrom'e cu nan a detecta cierto supuesto iregularidad y e minister di biaha a duna instruccion pa cuminsa cu un investigacion pa tin claridad den esaki.

El a splica cu a indica na su persona cu probablemente e director di SSA ta e persona cu tabata encarga cu e iregularidadnan aki. Na e momento ey, e director di SSA no tabata na Aruba. El a yega 10 di september y e siguiente dia, 11 di september, Consejo di Supervision a yama e persona aki aden y segun e Consejo a informa, nan a suspend'e mesora y a tuma su pertenencianan, ipad, laptop, yabi, etc. y aworaki ta keda pendiente pa e investigacion.

Minister Croes a splica cu ta trata primordialmente di tres number cu lo tabata haya cierto fondonan pa organisa algo deportivo cu aparentemente nunca a tuma luga. El a indica cu no tabata un biaha, pero varios biaha cu e tres number aki a bin dilanti.

“Ta trata di pagonan cu lo a bay pa tres persona specifico na mas cu un ocasion riba supuesto peticionnan pa deporte, cu segun informacion, nunca a tuma luga, y esey e investigacion ta basa su mes riba dje. Esey ta e liña cora cu a lanta e sospecho y a haci investigacion den e parti aki,” Croes a indica.

E mandatario a resalta cu otro medionan di comunicacion a culpa varios minister pa loke a sucede, pero el a aclaria cu ningun minister ta envolvi den e parti aki y cu ta algo hopi recien.

Croes a agrega cu e Consejo di Supervision a informa cu esun encarga a admiti por escrito su culpabilidad y cu e investigacion lo determina e proceso cu mester cana.

E mandatario a indica cu e no tin conocimiento di ken e tres persona aki ta. Minister Croes a clarifica cu SSA ta un stichting riba su mes y tin un two-tier model. E tin un Consejo di Supervision, cu ta controla y e tin e directiva cu ta haci operacionnan.

El a splica cu e placa ta bay pa federacionnan y pa años caba, banda di e placa cu ta bay pa federacion, nan tin un fondo tambe disponibel pa Premio Excelencia den Deporte (PED), tin otro fondo pa organisacion di Weganan Escolar (WE) Aruba y tambe tin otro fondo pa Weganan Interinsular.

Por ultimo e minister demisionario di Deporte a sigura cu tur federacion cu a haci peticion pa nan proyecto pa 2024 y a haya aprobacion desde januari pa henter e año, tur esey lo keda tuma luga. “A actua cor-

ecto, a proteha e fondonan di SSA pa tur federacion, a bin cu medidanan interno pa esaki no ripiti y ta mas cauteloso den tipo di maniobranan asina,” el a resalta.

Comunicado Aruba Sport Uni (ASU)
Diamars ultimo ASU, a traves di un comunicado di prensa, a aclaria e informacion y informa tur nan federacion miembro, mundo deportivo y comunidad general di e situacion. Nan a trece pa dilanti tres punto.

Prome nan a aclaria cu e directiva actual di ASU a ser eligi door di un proceso democratico den un Asamblea General. Di dos nan a remarca cu cada miembro di directiva a ser postula pa un federacion miembro di ASU. Y ultimo nan a subraya cu minister di deporte no por nombra miembro den e directiva di ASU.

Aunke minister Croes no a divulga number di ningun persona cu ta envolvi den e iregularidadnan aki, den su comunicado ASU ta informa cu e persona cu a wordo retira pa motibo di situacion andando ta Sr. K. Vrolijk.

“Nos di Directiva ta lamenta e situacion cu ta pasando y ta aclaria cu nos a distancia di e sucedido y cu Sr. K. Vrolijk a haya su retiro como tesoro na momento cu a haya sa di e situacion,” e comunicado a finalisa.


Bon Dia Aruba a tuma contacto cu e presidente di SSA, Soraida Bockhoudt, pero no a logra concretisa niun respuesta prome cu e ciere di edicion.

Peticion reunion publico parlamento
Relacion cu e tema aki parlamentario y lider di fraccion MAS, Marisol Tromp, parlamentario di fraccion MAS Aquanette Gunn y parlamentario y lider di fraccion ACCION21 Miguel Mansur a manda un carta pa presidente di parlamento, Raymond Kamperveen, pidiendo un reunion publico cu caracter di urgencia riba e investigacion di e iregularidadnan cu a sucede den SSA.


Den e carta e parlamentarionan ta splica cu Parlamento di Aruba a ricibi e rapport di Algemene Rekenkamer Aruba (ARA), titula “Op afstand, maar toch dichtbij” y cu den e investigacion aki caba ARA a constata cu tin iregularidadnan den fundacion SSA, cu por lo menos nan no tin reglanan na ordo y no ta tene nan mes na reglanan ni e statutan di e fundacion.

“Teniendo na cuenta cu SSA ta un fundacion cu a ser crea desde año 2016 y ta ricibi subsidio di miyones for di Fundacion Lotto pa Depore (FLPD) pa año, y pa 2024 a ricibi e suma record di 9 miyon florin na subsidio, ta di vital importancia pa parlamento wordo informa door di e minister encarga cu Educacion y Deporte, Sr. Endy Croes riba e ultimo desaroyonan den e fundacion aki,” e carta ta subraya.

Pa e motibo aki e tres parlamentario ta haya necesario pa haci peticion na presidente di parlamento y pidi un reunion publico cu caracter di urgencia pa minister Croes aclaria tocante e investigacion di e iregularidad den SSA.



Stichting Sportsubsidie Aruba



Na Presidente di Parlamento
Sr. Raymond A. Kamperveen
L.G. Smith Blvd. 72,
PRESENTE

25 september 2024

Ref: **Peticion pa un reunion publico cu caracter di urgencia riba Investigacion di iregularidadnan na Stichting Sportsubsidie Aruba (SSA)**

Conforme articulo 23 lid 1 di Reglamento di Ordo, suscritonan, miembronan di Parlamento ta aserca Presidente di Parlamento cu e siguiente peticion.

Parlamento di Aruba a ricibi e rapport “Op afstand, maar toch dichtbij” – een verdiepend onderzoek naar de instellingen op afstand van het Land” di Algemene Rekenkamer Aruba durante e Besloten Bijeenkomst no. 7, dd. 13 juni 2024 - IS/887/23-24, dd. 13 juni 2024.

For di e investigacion aki caba ARA a constata cu tin iregularidadnan den e fundacion di e.o. Stichting Sportsubsidie Aruba (SSA) y cu por lo menos nan no tin nan reglanan na ordo y no ta atene nan mes na e reglanan ni na e Statutan di e fundacion.

E siman aki prensa a divulga cu diripente suspensionnan y retironan a cuminsa cay den fundacion SSA, cual ta maneha miyones di florin cu mester bai na deporte.


Diamars SSA a manda un declaracion pa prensa den cual nan ta informa cu nan ta realisando un investigacion relaciona cu un posibel caso di iregularidad den e organisacion aki.

Teniendo na cuenta cu SSA ta un fundacion cu a ser crea desde anja 2016 y ta ricibi subsidio di miyones for di Fundacion Lotto Pa Deporte (FLPD) pa anja, y pa 2024 a ricibi e suma record di 9 miyon florin na subsidio, ta di vital importancia pa Parlamento wordo informa door di e Minister encarga cu Educacion y Deporte sr. Endy Croes riba e ultimo desaroyonan den e fundacion aki.


Pa es motibo suscritonan ta hanja necesario pa haci un peticion na Presidente pa yama un reunion publico cu caracter di urgencia cu MinOS sr. Endy Croes cu agenda:

“Aclaracion riba e investigacion riba iregularidad na Stichting Sportsubsidie Aruba (SSA)”


Atentamente,



Miguel Mansur
Lider Fraccion Accion 21



drs. Marisol Tromp
Lider Fraccion MAS



Aquanette Gunn
Parlamentario Fraccion MAS

Dos hoben deteni den caso di tiramento cu arma di candela

Diamars ultimo mediante un comunicado di prensa, Cuerpo Policial di Aruba (KPA) a informa cu dos hoben a keda deteni na Sabana Liber y na Madiki e mesun dia den oranan di mainta.

Den comunicado a señala cu Recherche di San Nicolas ta investigando un caso serio di tiramento cu arma di candela conhuntamente cu polis uniforma di San Nicolas cu a tuma lugar riba 8 di september 2024 na Esso Ville San Nicolas.

Den cuadro di esaki y un tremendo investigacion haci pa e recherchenan a haci un entrada hudicial na Madiki y Sabana Liber.

Den oranan trempan di mainta a haci detencion di dos hoben, ta trata aki di e personanan di inicial di A.J.Z.C.R. naci na Aruba y e otro hoben di inicial J.C.A.S. naci na Cuba di 17 aña di edad.

Equipo forma door di diferente unidad policial manera team di aresto, recherchenan,

K9 Unit como tambe cu sosten di fiscal di Ministerio Publico a haci e entrada hudicial.

E investigacion ta den full swing y nan no ta descarta cu lo por tin mas detencion proximamente.

Polis tambe ta indica cu den cuadro di e investigacion aki, si un persona a wak algo of si tin algun informacion, por comunica cu nan na e number 11141, nan ta garantisa anonimidad.



WOW ta organisa Tech Camp pa hobennan por siña mas di e mundo di tecnologia

WOW Aruba, cu ta un organizacion non profit crea pa duna sosten y apoyo na hende muhe pa por siña y apoya otro, ayera mainta a anuncia nan proyecto "Grit! Tech Camp" cu ta bay tuma lugar dia 12 di october dirigi pa hobennan muhe entre 13 pa 19 aña.

Den cualkier negoshi of sector, e diversidad di talento humano semper lo ta un piedra angular di innovacion. En particular, den e sector di tecnologia, e pluralidad aki ta busca pa forma un economia digital mas inclusivo y competitivo, cu ta habri oportunidadnan pa tur hende desaroya nan potencial, transformando e futuro di negoshinan, sectornan y comunidadnan pa medio di innovacion. Den e diversidad aki, e vision y talento di hende muhe ta fundamental.

Segun Myrienne Figaroa, ken ta fungi como head of community empowerment na e organizacion a enfatisa cu esaki ta un proyecto pa empodera e grupo di hoben muhe pa drenta den mundo di tecnologia 'Girls Represent in Tech' (Grit!) Pero tambe pa crea un característica den un persona cu ta haci uso di su pasion y su perseverancia pa e por logra su metanan aunke por haya cierto contratiempo na caminda.

"Nos ta haciendo esaki especialmente pa e hubentud di Aruba, awendia muchanan ya den un edad hopi hoben nan tin cu scoge pa nan scol y pa studionan cu nan kier haci y esaki no ta facil. Den ultimo tempo nos ta wak e mundo tecnologico ta avansando



asina rapido y cu tur e trabou cu ta biniendo aworaki den mundo laboral ta den e direccion di tecnologia. P'esey nos kier inspira y empodera e hobennan pa sigui un carera den tecnologia," el a bisa.

Nan a scoge muchanan muhe pa motibo cu den reciente conferencia dedica na Hende Muhe na maart ultimo, ex-director di Central Bureau of Statistics (CBS) Desiree Helder a indica cu hende muhe ta di opinion cu solamente 3% di nan tin un contribucion riba e sector di Telecomunicacion y solamente 5% tin un contribucion den sector di Investigacion y Ciencia.

"Esaki ta hopi abou y nos ta desea por medio di e tech

camp aki informa e hobennan pa asina nan sa kico ta come y bebe den trabounan den tecnologia y asina por explora un carera den esaki," Figaroa a señala.

Pa e evento, nan tin 4 speaker local hende muhe como por ehemplo, Wendy Koffy ken ta parti di ekipo di management di Aruba Bank, Lucia Werleman ken lo papia di transformacion no solamente den tecnologia di companianan grandi pero tambe den aspecto humano di con nan ta adopta e tecnologia aki como empleadonan, ademans Kristel de Nobrega ken ta specialisa den Cybersecurity lo papia di e importancia di esaki y Lucienne Lacle ken ta un Tech Consulting y lo splica

kico product management ta.

Nan ta bay tin diferente sesion interactivo pa e dia aki unda e hobennan lo ricibi informacion necesario riba diasabra 12 di october for di 9or di mainta pa 1or di merdia na Setar di Sero Blanco.

Di su parti, Shahayra Morales-Croes ken ta presidente di WOW (Women empOwering Women) Aruba a splica cu WOW ta un organizacion non profit cu a ser funda na aña 2017 pa seis amiga cu a wak e necesidad na unda un ser femenino por ta hunto pa haci networking pa siña y papia riba diferente tema di desaroyo personal of profesional.

Cu esaki, nan tin nan parti

unda nan ta duna back na comunidad den forma di empoderamento, no solamente dirigi riba nan miembro sino tambe comunidad y e aña aki nan enfoca a bay un tiki mas riba e hobennan unda nan a mira e necesidad pa duna informacion especificamente pa muchanan muhe y asina nan por haya sa un tiki mas "y por tin rol models den nos comunidad y sigur e tema aki ta importante," el a sigura.

Vanessa Donata, ken ta forma parti di marketing executive di Setar a trece dilanti cu como e compania di telecomunicacion principal na Aruba nan ta hopi contento di por participa den evento aki unda nan ta spera di por conta cu e asistencia di hasta 100 persona e dia ey.

Di acuerdo cu UNESCO, solamente 3 di cada 10 hende muhe na mundo ta studia careranan STEM (ciencia, tecnologia, ingenieria y matematica), un cifra cu ta cay te na 8% den careranan di Ingenieria y 3% den esnan relaciona cu Tecnologia di Informacion, lamentablemente di esnan cu ta gradua, menos cu 10% ta logra haya trabou den e industria aki.

Espacio pa ricibi hende muhe den industria di tecnologia a ser habri principalmente debi na e demanda grandi cu ta resulta di aceleracion digital, companianan a haya nan mes cu un falta di talento femenino, cual ta e motibo di pakico nan ta mira como esencial pa genera e interes aki den hende muhe pa profesionnan y actividadnan relaciona cu tecnologia.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart

Redaccion

noticia@bondia.com

Pilar Flores (hefe di redaccion)

Angenette Figuereo (closer editor)

Leo Maduro

Andreina Morillo

Raisa Montilla

Oriana Geerman

Ehecutivo di Benta

sulaika.croes@cspnv.com

Sulaika Croes

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion

accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)

Pablo Libre

Press

Roland Schenker (Hefe)

Omar Ramirez

Martin Boekhoudt

Francis Dirksz

Colaboracion

Associated Press

Ret Karibense

Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22

Tel: 582-7800

Email: noticia@bondia.com

aviso@bondia.com

info@bondia.com

Website: www.bondia.com

Facebook: @bondianoticia

Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Ni den campaña tin... Interes pa finanzas...?

Recientemente a yama nos atencion cu un parlamentario a comenta cu porfin e actual ministro di finanzas lo a admiti cu su maneho no ta bon. Naturalmente e mandatario mes lo tin otro opinion y e parti interesante no ta pa compara e dos puntonan di vista, cu di tur manera lo ta diametralmente contrario. Mas bien nos kier enfoca riba e hecho cu casi nunca nos ta mira comentario di parlamentario riba maneho financiero y si acaso esey tuma lugar, ta trata mas tanto di politica general encunto e tema aki. Loke nos no ta mira, sin embargo, ta critica riba e concretisacion den practica di e maneho, unda a pesar di e esfuerzonan anuncia nos ta keda mira fayograndi den e procesonan fundamental cu ta relaciona cu dunamento di cuenta financiero na e nivel mas halto.

Asina nos por mira cu supervision financiero di Reino y esun di parlamento di Aruba ta keda manca pa falta di cumplimento cu e requisitonan basico pa mehora e trayectonan cu mester percura pa resolve e problemanan aki. Un di nan ta e trayecto di entrega na tempo di cuenta anual na Contraloria General (Algemene Rekenkamer), pa e organo independiente aki por haci nan trabao. Nos ta bayendo pa 10 aña di supervision financiero y ainda ta acepta como algo 'normal' cu ta keda stroba e labor constitucional aki, sin tanto reproche for di banda parlamentario, cu ademas tampoco ta haya e cuentanan pa aproba na tempo. Ta parce cu e problema cronico practicamente no ta molestia casi ningun di nos parlamentarionan. Bo por puntra bo mes pakico nan no ta preocupa; nos ta bolbe riba e punto aki.

E otro problema di tardanza cu reportahe ta e entrega di e rapport trimestral cu mester ta na CAft, y parlamento, seis siman despues di vencimento di e periodo referi. Nos ta na fin di september y apenas gobierno di Aruba a entrega un rapport, cu mester tabata entrega n mitar di mei, y e segundo rapport programa pa mitar di augustus, no a mira luz di dia ainda...

Nos ta sinti e inclinacion pa no puntra mes ki intencion tin pa mehora e trayectonan aki, pasobra ya nos a tende e lista di lamentu cu ta e supuesto contesta varios biaha caba. Sin embargo, cos no por keda asina pa e simple hecho cu e falta di diligencia pa gara e toro aki na su cacho tin consecuencia serio pa e labor di supervision, tanto di Reino Hulandes como di parlamento di Aruba. Pa bisa e cos manera cu e ta, e situacion ta percura pa no por tin supervision na tempo, pues de hecho no tin supervision anto. Awor, claro cu nos mester tene cuidao pa no sugeri cu e 'falta' aki ta un politica explicito; nos

no tin indicacion di esey. Pero di otro banda, si no tin mehoracion visible den esaki, anto e resultado practico ta cu e beneficiario factual ta e actual gabinete (demisionario) cu no ta haya nan stroba pa comentario fastioso cu ta haci goberna mas incomodo. Pa por duna un evaluacion obhetivo di e asunto aki, ta necesario anto contempla con trabao di e entidadnan di control ta tuma lugar. Pa cumenza, gobierno mes tin falta di e cuadronan profesional pa percura pa e reportahe financiero ta cla na tempo, pa Contraloria y Accountantsdienst por haci nan trabao. Gobierno no por bisa cu cara seco cu no tin recurso, pasobra esey tin suficiente. Un problema fundamental ta e situacion na Centrale Accountantsdienst, cu un tempo tabatin 22 empleado, y awor cu gobernacion a casi duplica, nan no ta yega na 10 persona, segun nos informacion... Con bo kier tin control anto...?

Ta di aprecia cu e mandatario concerni lo a admiti, segun e parlamentario menciona, cu cos no ta anda bon den reportahe financiero. Sin embargo, esey no ta e asunto clave; esey ta: kico tin programa pa kita e obstaculonan menciona di falta di personal? Esey nos no ta tende. Si tabata posible pa haya asistencia di e Tijdelijke Werkorganisatie (TWO) pa financia personal na Servicio di Impuesto, no tabata posible haya hende pa Departamento di Finanzas y Accountantsdienst? Asina 'cheap' Hulanda ta cu su apoyo profesional? Ademas di tur esaki, gobierno ta 'lastrando pia' cu percura pa e entidadnan conveni cu ta pertenece na e 'sector colectivo' entrega nan cifranan na tempo, tambe pa por yega na un vista real di e total di gasto di personal cu desde 2024 no ta a base di personal di e ministerionan so. Loke ta straño ta cu normalmente tur gobierno tin nan 'lineanan di mando' den tur entidad estatal o semi-estatal masha cortico mes, pero ora ta trata di asunto financiero ta surgi e lamentu di poco credibilidad cu "ya, nos no por forza nan".

Pa bolbe awor na e poco interes den parlamento pa controla asunto financiero. Esaki ta algo di tur tempo. E custumber ta asina bon implanta cu casi bo ta kere cu mester por tin un interes mas general den mantene finanzas gubernamental sin berdadero control. Na Hulandes nos conoce e dicho "in troebel water is het goed vissen"; pisca den awa turbio ta resulta mas facil. Tin un interes politico general, cu no ta conta pa cada politico individual, cu bin haya finanzas publico no transparente ta beneficia un gobernacion cu por continua cu practica relaciona cu corrupcion y amiguismo, loke no ta cuadra cu control financiero estricto? Aki tin otro pregunta critico cu nos por haci na tur partido politico den campaña, sin distincion. Ken ta contesta?

Luna di Locura cu Lotto 5 ta wordo extendi!

Cu cada 2 Lotto 5 riba e mesun ticket, ricibi 1 Lotto 5 loco completamente gratis riba e mesun ticket!

Pa motibo cu e promocion di Luna di Locura ta asina gusta, Luna di Locura cu Lotto 5 ta wordo extendi y lo continua te cu luna di november! Cu cada compra di 2 set di number di Lotto 5 riba e mesun ticket, bo ta ricibi un ticket di Lotto 5 loco completamente gratis ariba mesun ticket.

Si bo cumpra 4 Lotto 5 riba e mesun ticket bo ta ricibi 2 Lotto 5 loco completamente gratis ariba e mesun ticket. Si cumpra bo 6 Lotto 5 riba e mesun ticket bo ta ricibi 3 Lotto 5 loco gratis ariba e mesun ticket. Kiermen mas Lotto 5 bo cumpra riba e mesun ticket, mas Lotto 5 loco bo ta ricibi gratis y asina mas chens bo tin pa gana e jackpot

di Lotto 5!

Lotto 5 ta costa solamente 4 florin pa ticket y bo por combina bo 5 numbernan for di 01 te cu 35. Pidi bo rebendado pa bo 2 set di 5 numbernan riba e mesun ticket y asina bo ta ricibi un Lotto 5 loco completamente gratis ariba e mesun ticket. Si bo no sa cua numbernan pa scohe, bo ta pidi bo rebendado pa 2 Lotto 5 loco riba e mesun ticket y ricibi un tercer Lotto 5 loco completamente gratis.

E promocion aki ta valido te cu 30 di november pa e sorteonan di Lotto 5. Por cumpra bo weganan di Lotto te cu 7:30PM na bo rebendado preferi. Sorteo di Lotto 5 ta hunga riba tur diaranson y diasabra anochi pa 7:45PM na TeleAruba pero tambe por

wak sorteo di Lotto riba nos pagina di Facebook y YouTube.

Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Tambe lo por hunga Lotto Online door di bishita: play.lottoaruba.com pa por registra y cuminsa hunga bo weganan favorito di Lotto. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.



Ta aloca fondo pa ehecuta proyectonan E-LOFA, 3 Lines of Defense y Verslaggevingsstelsel segun landspakket

Minister di Finanzas a presenta e Nota di Fin di Aña 2024 na Parlamento di Aruba den cual ta informa e Parlamentarionan riba e cambionan cu ta prepara den e segundo Presupuesto Complementario 2024 cu pronto lo keda presenta na Parlamento pa su aprobacion. Den e Nota por mira tambe e cambionan cu ta necesario pa aloca e fondonan pa proyectonan den cuadro di implementacion di e Landspakket.

Pa locual ta e cartera di Finanzas, Minister Xiomara Maduro ta informa cu ta aloca fondo pa realisa proyectonan den cuadro di Thema A Landspakket cu ta trata e

mehoracion di e maneho financiero di Aruba. Den esaki tin e E-LOFA cu ta e curso digital di Leergang Openbare Financiën cu lo yuda na capacita y engrandece e conocimiento di finanzas publico di e trahadornan financiero di Gobierno di Aruba. Banda di esaki tin e proyecto di '3 Lines of Defense' cu ta un proyecto grandi den cual e procesonan y administracion financiero di Gobierno ta wordo optimalisa. Tambe tin e proyecto di 'verslaggevingsstelsel' cu ta un otro proyecto grandi cu mester hiba na certificacion door di un accountant externo di e Cuenta Anual di Pais Aruba di aña 2026.

Den un comunicado di pren-

sa minister ta enfatisa cu e proyectonan aki ta hopi importante pa e mehoracion di finanzas publico di Aruba. E proyectonan di '3 Lines of Defense' y 'Verslaggevings-

telsel' ta proyectonan grandi cu ta tuma tempo, ta costa placa y ta exige basta capacidad pa asina por keda ehecuta. Den pasado, por ehempel, na Hulanda mes a dura mas di


20 aña pa caba di implementa e mehoracion nan necesario den e proyecto 'Operatie Comptabel Bestel' pa yega na jaarrekening certifica door di accountants externo.



Landspakket Aruba

Uitvoeringsagenda
1 april – 31 augustus 2024

Thema A: Financieel beheer	Thema E: Economische hervormingen
Thema B: Kosten en effectiviteit publieke sector	Thema F: Zorg
Thema C: Belastingen	Thema G: Onderwijs
Thema D: Financiële sector	Thema H: Versterken rechtsstaat



ANUNCIO/BLBA/124/24

Di acuerdo cu articulo 3 di "Arbeidsbesluit III" Mediator di Gobierno na Aruba ta anuncia lo siguiente:

- Siguiente referendum lo wordo teni bao empleadonan di:
 Number di EMPRESA : "GIGICHA N.V." (Sesview Contractor & Investment 2)
 Fecha di referendum : **Diabierna, 27 di september 2024**
 Duracion di referendum : **17:00 pm – 19:00 pm**
 Luga referendum : **Bureau Landsbemiddelaar Dr. Henriquezstraat # 19**
- Na dicho referendum lo participa e sindicatonan:
Federacion di Trahadornan di Aruba (FTA).
- Empleadonan cu tin derecho di voto cual ta aparece ariba e lista cu ta bai pa e partidonan dia 25 di september 2024.

Aruba, 25 di september 2024
 Mediator di Gobierno
 Anselmo Pontilius

Politiconan Hulandes ta vota pa ordena gabinete pa dona vacuna di mpox pa Africa

(NLTimes)—Parlamentarionan Hulandes a vota diamars pa ordena minister di Salud Fleur Agema pa dona parti di e deposito Hulandes di vacuna di mpox pa paisnan Africano unda e virus ta plamando, aunke Agema ta opone e idea. Un di e partidonan den coalicion cu PVV, NSC, a kibra rangonan y a uni e oposicion den e voto den Tweede Kamer.

Tweede Kamer a ignora e protestanan di Agema, y a orden'e pa comparti e vacunan. El a anuncia caba cu e lo cumpli cu e medida. E



mayoria di e 100,000 dosis cu Hulanda tin den su posesion lo keda den e deposito di e pais. Pero Tweede Kamer ta pensa cu 13,200 dosis cu un duracion limita no lo ser usa inmediatamente na Hulanda.

Pues, nan por ser poni den

miho uso por medio di desplega esaki den Centro Africa na paisnan manera e Republica Democratico di Congo. Segun e partidonan den oposicion y e partido di coalicion den gobierno, NSC, Hulanda lo ser miho sirbi por medio di combati e brote eyan.

Agema kier a keda “cuidadoso” y a bisa cu e lo solamente considera dona vacuna un bes cu Hulanda ricibi haya dosis nobo otro aña. Pero Tweede Kamer no tabata convenci, cu fraccionnan representando 79 di e 150 asiento den e camara votando pa forsa Agema

haci e donacion.

Pasobra NSC tambe a para firme, un mayoria den Tweede Kamer a vota diamars den favor di e yamadonan pa Agema pa haci e donacion. E mocion di D66 a mira aporte di NSC, como tambe SP, GroenLinks-PvdA, PvdD, Denk, Volt, ChristenUnie, SGP, CDA y JA21.

Un variante nobo di e virus di mpox, conoci anteriormente como e virus monkeypox, a avansa den Centro Africa den e ultimo lunanan. Por combati esaki cu e vacuna di smallpox, di cual Hulanda tin casi 100,000 si acaso e vi-

rus reaparece.

Hulanda tambe tin un deposito grandi di vacuna contra smallpox di un generacion mas bieu, cual Agema a dicidi pa no inclui den su calculacion. El a bisa esaki ta debi na e efectonan y limitacion riba uso.

E entrega aki di 13,200 lo yuda “ambos nos mes y e paisnan Africano afecta,” segun parlamentario di D66 Wieke Paulusma, ken a entrega e mocion. “Por medio di combati e brote na e fuente, nos ta preveni esaki di dreña nos pais.”

Potret di Tweede Kamer.

Sepsis y desnutricion ta plaga mamanan y baby di Sur Darfur



(AP)—Mama- y muchanan den e region Sudanes di Sur Darfur ta experienciando un di e “pio” emergencia di salud na mundo, segun organizacion humanitario Doctors Without Borders a bisa diamars, cual ta un di e consecucionan di e violencia cu a tormenta e pais desde april 2023.

Doctors Without Borders, conoci tambe como MSF, a bisa den su rapport mas recien cu 114 morto materno a sucede durante e periodo for di januari pa mey augustus 2024. Mas cu 50 por ciento di morto materno a sucede den setting medico, cu sepsis e causa mas comun di morto den facilidadnan. Entre januari y juni, 48 baby a nace for di sepsis na dos facilidad medico, e organizacion a bisa.

Desnutricion entre muchanan na Sur Darfur tambe ta surpasa e limite di emergencia, e grupo a bisa, agregando cu demandanan pa atencion medico “ta surpasa na loke MSF por responde.”

Na augustus, 30,000 mucha bao edad di dos aña a ser evalua pa desnutricion, incluyendo casi 33 por ciento cu desnutricion acuut y 8.1 por-

ciento cu ta severamente desnutricion of cu desnutricion acuut,” MSF a bisa diamars.

E situacion tabata particularmente emergente pa hende muhe na e Nyala Teaching Hospital y Kas Rural Hospital, unda MSF a reporta 46 morto materno entre januari y augustus. Den e dos hospitalnan ey, 78 por ciento di morto materno a sucede dentro di e prome 24 ora despues di admision.

Hende muhe ta yega frecuentemente na hospitalnan den condicion critico debi na costonan halto di transportation y un deficit den facilidadnan medico den funcion, MSF a bisa. E muhenan aki a ser forsa pa duna luz den ambiente no sterilisa debi na e falta di recursonan medico cu por preveni infeccionnan.

“Un pashent na estado for di un area rural a warda dos dia pa colecta e placa necesario pa haya cuido,” segun Maria Fix, e lider di ekipo medico di MSF na Sur Darfur. “Ora el a bay na un centro di salud, nan no tabatin medicamento pues el a bay back cas. Despues di tres dia, su condicion a deteriora, pero atrobe e mester a warda cinco ora pa transportation. Ya e tabata den coma ora el a yega cerca nos. El a

muri for di un infeccion prevenible.”

Mayoria organizacion hu-

manitario no a regresa na Nyala, e capital di Sur Darfur, desde e guerra eyan a plama,

lagando MSF como un di e tiki gruponan internacional eyan.

MULTIPLICA BO PREMIO CU

MULTI-X

www.lottoaruba.com

Corsou su regulacionnan di eleccion mester di reforma segun Minister di husticia

(CuraçaoChronicle)
- Minister di Husticia Shalten Hato di partido MFK ta di e opinion cu e regulacionnan di eleccion na Corsou tin mester di evaluacion y reviso.


Sin cambio, e no lo ta posibel pa establece stacion y distrito adicional pa votacion.

Lider id partido MAN Giselle McWilliam a haci yamado pa e digitizacion di e proceso di voto na Corsou.

Durante un reunion parlamentario, el a propone crea un plataforma online unda e personanan cu vota lo ricibi nan carchi di votacion como codigo QR, cual ta elimina e dependencia riba e servicionan di post.

McWilliam a bisa tambe cu e ta boga pa cahanan di votacion mobil y proceduranan di votacion cu ta mas flexibel, cual lo permiti e ciudadanonan vota na varios sitio manera hospital y casnan di cuidu.

Den su respuesta na e preguntanan cu e parlamentario di partido MFK Juniel Carolina y Mc William a haci, Hato a declara tambe cu e regulacionnan di eleccion cu tin actualmente no ta permiti expande e localidadnan unda por vota, ni tampoco e ta permiti e introduccion di e stacionnan di votacion mobil cu e parlamentario a sugeri, cual ta haci e reformanan sugeri necesario.



MAN-PIN y PNP ta haci un yamado pa reunion publico urgente pa atende HAP



(CuraçaoChronicle)
- MAN-PIN y PNP su fraccionnan den Corsou su parlamento ta haciendo un yamado pa un reunion publico tuma luga pronto pa trata e problema di Huisartsen Post (HAP), despues di e kehonan constante cu ta ricibi for di publico tocante e calidad di e cuidu cu ta provee. E fraccion MAN-PIN a haci e anuncio aki via un comunicado di prensa.

Segun e partidonan cu ta den oposicion, tin varios indicacion fuerte cu e cuidu cu ta provee na HAP no ta suficiente, cual ta posiblemente ta haci cu a resulta den mortonan prevenibel. Nan ta buscando tambe clarificacion

riba e nivelnan di empleado cu tin, e disponibilidad di ekiponan medico y con hopi of bon ta cumpli cu e protocolnan. “E proceduranan administrativo, cual aparentemente ta atrasando e provision di cuidu, tambe mester keda investiga,” e partidonan a declara.

Di acuerdo cu Artikel 64 di Reglanan di Procedura, e fraccion MAN-PIN, conhuntamente cu e fraccion PNP lidera pa Elvin Gerard, ta haciendo e peticion di un reunion publico.

Tambe nan ta exigiendo pa e minister actual di salud, ambiente y naturalesa Javier Silvanía ta presente na e sesion.

SER a entrega rapport di e reformanan den sistema di salud

Konseho Sosial Ekonómico (SER) a entrega un informe consultivo extenso na e Minister di Salud, Medio Ambiente y Naturalesa (GMN).

E informe ta trata e reformanan cu ta ser propone den e proyecto di ley cu ta rigi regulacion di mercado di salud, cu e meta principal pa mehora eficiencia y reorganisa financiamiento di salubridad publico na Corsou.

Un di e puntonan importante den e proyecto di lei ta e recomendacion pa duna e responsabilidad pa supervisa e cumplimiento di standard di calidad den e sistema di salubridad publico na

e Autoridad Regulatorio di Corsou (Regulatory Authority Curaçao, RAC), cu anteriormente tabata conoci como Bureau Telecommunicatie & Post (BT&P).

Cu esaki, RAC lo haya e tarea pa controla cumplimiento di e normanan di calidad den sector di salud, loke ta encera cu e sistema di regulacion di e sector lo ser centralisa.

SER ta confia cu su recomendacionnan lo ta relevante ora di tuma decision riba e reformanan di salud, na momento cu Corsou ta buscando un balans entre eficiencia den gastonan di cuidu y duna servicio medico di calidad cu ta accesibel pa tur habitante di e isla.



Casi un cuarta parti di warda di polis a cera den e ultimo cinco año

(nltimes.nl) - Casi un cuarta parti di wardanan di polis na Hulanda a cera nan porta den e ultimo cinco año, EenVandaag a informa a base di cifranan di Polis Nacional. Na 2019, e pais a conta 293 warda di polis caminda hende por a bay 24/7 pa reporta un crimen, por ehempel. Awor, tin 227.

E cantidad di wardanan di polis a baha den tur unidad di polis regional, pero mas tanto den e region di Rotterdam. Eynan, 16 di e 38 wardanan a disparce for di 2019. E region di Noord-Nederland, cu ta inclui Friesland, Groningen y Drenthe, a perde mas cu un tercera parti di su total di wardanan di polis.

E ciudad di Friesland di Wolvega actualmente tin un warda di polis, cu lo cera otro año. Alcalde André van Nadort a yam'e "un cos hopi malo" cu pronto ciudadanonan lo mester bay Heerenveen pa entrega un denuncia fisi-

camente. "Bo ta mira cu polis ta disparce for di e ciudadnan, pero specialmente for di e pueblo- y barionan," el a bisa EenVandaag. "Y pa tin confianza den polis, ta hopi importante cu oficialnan ta visibel den bario. Simplemente bo ta mira menos polis."

Van Nadort tambe a bisa cu ta crucial pa polisnan tin un laso cu e bario cu nan ta traha

aden. "Como cu nos tin nos propio warda di polis ainda, polisnan di bario ta cuminsa nan turno eyan ainda. Esaki ta e luga caminda nan ta traha for di; for di aki, nan ta bay den e bario." E ta preocupa cu e vinculo cu oficialnan tin cu localnan lo disparce ora nan cuminsa traha for di Heerenveen.

E acuerdo di gobernacion di

Gabinete Schoof I ta bisa cu e gobierno nobo lo enfoca hopi riba aumenta e visibilidad di polisnan riba caya. E Gabinete kier habri mas warda di polis na luganan manera cas di pueblo y biblioteca, aunke e localidadnan aki lo ta habri solamente te na un grado limita y ciudadanonan lo por bishita solamente cu afspraak.

Pieter van Vollenhoven, e ex

presidente di Junta di Seguridad Hulandes cu a haci investigacion amplio riba e reorganizacion policial casi 12 año pasa, ta culpa e bahada di wardanan di polis riba e formacion di Polis Nacional. Ciere di wardanan di polis tabata un parti delibera di e reorganizacion, el a bisa EenVandaag. "Sin ningun prueba, a determina cu por a spaar asina tanto placa," el a bisa. "Pero esey no tabata basa riba nada y e cortamentonan ey simplemente a sigui."

Polis Nacional a bisa e programa cu wardanan di polis ta existi pa sostene e trabou di polis. "Y e trabou ey a bira menos y menos dependiente di un oficina fisico," un vocero a bisa. "Caminda antes coleganan mester a regresa e warda pa tur tipo di accion, awor nan por haci nan trabou casi tur caminda cu hermentnan digital. Mantene wardanan di polis habri tambe ta costa tempo y placa, y nos mester maneha tur dos cuidadosamente."



Gabinete ta dobla na e menasa di welga nacional di sindicato, lo negocia un acuerdo di retiro trempan

(nltimes.nl) - E exigencianan di e gremio comercial FNV pa un schema di retiro adelanta pa personanan cu trabounan pisa cu nan a manda pa Tweede Kamer ta negociabel pa Gabinete. Minister Eddy van Hijum (Asuntonan Social) a bisa esaki durante un debate den Tweede Kamer, e camara mas abao di parlamento Hulandes.

"Ora mi wak e carta di FNV, mi no ta mira ningun piedra cu ta stroba pa un bon combersacion substancial", segun e minister. E sindicatonan a rechasa e prome proposicion di Gabinete. Nan lo sigui solamente cu e combersacion ora nan haya garantia cu lo tin un arreglo permanente na luga di esun temporal, cu ta caduca pronto.

Esaki ta bini despues cu FNV a menasa cu welgan largo den varios sector pa e proximo luna. Na comienso di e luna aki, trahadonan di limpieza na Aeropuerto Schiphol a protesta pa un miho schema di retiro trempan.

Ademas, e sindicato kier pa e doñonan di trabou por paga un suma mas halto di pen-

sioen anticipa sin un boet di belasting. Segun FNV, cual profesionnan ta wordo clasifica como pisa mester wordo regla den negociacion di contracto colectivo laboral.

"Mi kier djis un bon arreglo," Van Hijum a bisa Tweede Kamer. Y e kier "sali for di e buraco mas pronto posibel." Pero, el a enfatisa, un bon distincion ta esencial pa evita cu mucho hende por stop di traha mas trempan.

E minister a priminti di considera e deseonan di e partidonan durante e negociacionnan. Hopi partido a bin cu proposicionnan pa mehora e schema. Actualmente, e schema no ta permiti hende cu trabou pisa y un entrada abou pa baha cu pensioen mas trempan, mientras cu hende cu trabou di oficina si por. Casi tur e partidonan a papia di nan deseo pa drecha esaki.

Segun GroenLinks-PvdA y SP, un cantidad di drempel mas halto por yuda cu esaki. Sinembargo, nan proposicion pa redobla esaki ta mucho leu pa Van Hijum. E minister si ta mira espacio pa negociacion, aunke el a para keto pa

nombra un number.

Thierry Aartsen di VVD a bisa cu e definicion di un trabou pisa mester ta predetermina. Esaki por wordo haci door di limita e cantidad di acuerdonan colectivo cu un schema di retiro anticipa. E partidonan isquierdista tin miedo cu hendenan cu ta haci trabounan pisa lo perde e schema debi na esaki.

Luc Stultiens di GroenLinks-PvdA ta supone cu dunadonan di trabou lo evita di gasta placa na retiro anticipa pa hende cu no tin mester di esaki.

FNV a keda "gratamente sor-

prende" pa e comentarionan di Van Hijum. "Nos ta especialmente gratamente sorprendi pasobra e solucionnan aki tin nuebe luna riba e mesa di ministerio di Asuntonan Social y Empleo, y nada di esaki no a keda refleha den e proposicion di e minister. Nos accionnan manera combersacionnan exploratorio y entrega di proposicionnan por escrito tabata parce di a cay den horeanan sordo na e ministerio," e sindicato a bisa.

E sindicato a enfatisa cu e minister no mester preocupa cu gastonan halto pa Estado. "FNV a indica caba cu e

sectornan mes mester paga e gastonan di e schema aki. E minister tampoco no mester tin miedo cu un bon schema lo aumenta e cantidad di vacatura of causa cu e mercado laboral ta crece krom. Un bon schema permanente pa trabou pisa ta permiti empleadonan tambe pa haci e trabou aki," e sindicato a declara.

E sindicato awor kier un "combersacion di aclaracion" cu e minister pa clarifica e situacion prome cu por hiba mas negociacion riba e contenido. FNV tin planea pa invita e minister pa haci esaki.



Guatemala ta uni pa combati malnutricion infantil

(EFE) – Guatemala ta e di seis pais na mundo cu e pio cifranan di malnutricion infantil, segun Unicef. Ademá, e situacion ta empeora na departamentonan rural manera Huehuetenango caminda 87.4% di mucha homber y mucha muhe tin algun tipo di desnutricion. Mirando esaki, varios sector a bini hunto pa combati e situacion aki.

Asina ta e caso di Guatemalaconan pa Nutricion (GPN) y Ministerio di Salud Publico y Asistencia Social (MSPAS), entidadnan cu a formalisa pa di dos biaha “un aliansa strategico pa combati malnutricion agudo den e departamento di Huehuetenango”, un area den cua 65% di e poblacion ta indigena.

Segun Unicef, un di e problemanan grandi di malnutricion infantil den e pais Guatemala ta e dieta abou den vitamina cu menornan ta ricibi. Tambe, gran parti di esaki ta basa casi exclusi-



vamente riba e consumo di tortilla di maishi, un aspecto cu tin consecuencianan serio riba e salud di muchanan.

Pa atende e impacto aki na un manera transversal, e colaboracion entre GPN y MSPAS ta propone pa “implementa un acercamento amplio cu ta cubri tanto cuidio medico como nutricional y tambe e identificacion di tratamiento

di e causa subyacente di e condicion serio aki.”

Den e sentido aki, e protocolo di recuperacion crea pa GPN ta busca pa desaroya accionnan sostenibel cu ta enfoca riba e determinantenan biologico, ambiental y economico di malnutricion agudo, di cua casi henter e poblacion infantil di e departamento ta sufriendo di dje.

“Pa enfrenta malnutricion agudo, ta esencial pa uni forsa: e aliansa aki entre GPN y MSPAS no solamente ta provee e recursonan necesario, pero tambe ta encurasha un acercamento coordina y sostenibel, maximisa e impacto riba e salud y bienestar di e muchanan mas vulnerabel” Silva a enfatisa.

Ademá, segun e director, a

keda demostra cu hunto cu intervencionnan medico-nutricional, e acercamento aki ta efectivo pa garantisar e sostenibilidad di e recuperacion di mucha homber y mucha muhe afecta.

A base di e informacion comparti pa ambos entidad, e strategia lo beneficia mucha muhe y mucha homber referi pa MSPAS cu malnutricion agudo na Huehuetenango y lo ser desaroya den cuatro fase: intervencion medico-nutricional, bishita interinstitucional pa identifica causa, implementacion di accionnan sostenibel y clausura positivo di e casonan.

Mirando e situacion urgente, e prome fase lo tuma luga dia 27 di september, cu bishitanan na cas cuminsando for di october. Ta spera cu e prome resultadonan lo ta disponibel na mita di october, y, dependiendo di cada caso, cu e recuperacion di e muchanan por ser logra dentro di tres luna.

Peru: Tin frustracion entre turista pa por drenta Machu Picchu

(Infobae) – Pa mas cu un siman, tin dificultad pa drenta na Santuario Historico di Machu Picchu, loke ta genera molester entre di turista y operadonan di tour.

Esaki a origina for di un accidente cu a laga 31 persona herida, incluyendo nacional y stranhero. E compania encarga cu e servicio di bus, Consettur, mester a reduci su flota debi na mantencion di varios unidad, loke a causa rijnan largo y retraso den transporte di bishitantenan.

E compania, cu normalmente ta opera alrededor di 28 bus pa hiba turistanan di Machu Picchu Pueblo pa e ciudadela, actualmente tin solamente 20 unidad den operacion. Esaki ta traduci den e suspension di numeroso frecuecianan diario, afectando centenares di turista cu no por subi na tempo, generando frustracion cerca esnan cu a warda oranan, of hasta dianan, pa por cumpli cu nan itinerario.

Presidente di Asociacion Peruano di Turismo di Aventura y Ecoturismo (APTAE), Francisco Basili, a expresa su preocupacion pa cu e situacion. El a señala cu e com-



pania Consettur a kita entre seis y ocho bus for di servicio despues di e accidente pa haci mantencion, loke a reduci capacidad operacional considerablemente.

E representante di sindicato tambe ta splica cu cada bus por realisa hasta tres frecuencia diariamente. Cu salida di servicio di ocho unidad, esaki ta implica un reduccion di 24 frecuencia diario, cu ta afecta centenares di turista. Ministerio di Cultura ta purba di mitiga e situacion permitiendo na esnan cu ta perde nan

turno por bay den e siguiente biahe, pero esaki no ta solucion a problema, ya cu na final di dia ta hopi bishitante ta keda sin subi.

El a señala cu su presencia na Cusco ta responde na e necesidad pa siña mas tocante e efectonan di e crisis di transporte riba turistanan. “E motibo cu mi a bin Cusco ta pa mira di prome man kico ta pasando cu e pasaheronan cu ta eynan. Mi tabata riba tereno, scuchando nan kehonan y e frustracion ta bisto. Hopi di nan a crusa mundo pa wak

Machu Picchu, pero nan ta topa cu maltrato evidente”, el a remarca.

Presidente di APTAE a indica cu e reduccion di frecuecianan aki ta dañá seriamente e imagen turistico di e pais, specialmente den un contexto unda e fluho constante di bishitantenan internacional ta vital pa economia local. “Bishitantenan cu no por yega na e santuario pa motibo di retraso ta comparti nan experiencia riba rednan social, loke ta dañá e percepcion di e destinacion,” el a menciona.

Ademá, el a critica e falta di planificacion y anticipacion di parti di Consettur, un compania cu, segun e, mester a implementa medidanan di mantencion preventivo prome cu e accidente a suceder.

Sindicato di turismo a purba di establece comunicacion cu e compania di transporte y autoridadnan competente, pero e contesta no tabata alentador. Segun Francisco Basili, e compania a limita su mes na garantisar cu su protocolnan di mantencion y seguridad ta na su luga, aunke realidad diario ta demostra lo contrario. “Ta suficiente pa mira e imagennan di e rijnan largo y turistanan pega pa realisa cu e situacion ta leu di ta normal”, el a bisa.



Haiti: Incidente diplomatico ta trece dilanti diferencia den gobierno

(DiarioLibre) – Den e marco di e celebracion di e di 79 periodo di sesion di Asamblea General di Nacionnan Uni (ONU), Haiti a bira e tema di debate e siman aki, ya cu varios pais a uni na e solicitud cu comunidad internacional mester muestra su apoyo na e nacion aki pa logra solucion a su crisis social, economico y di seguridad.

Incluso e grupo di paisnan di G7 a solicita cu mester completa e despliegue di agentenan den e tereno lo mas pronto posibel, mientras e delegacion di Haiti cu a acudi ONU na New York a mantene nan mes realizando reunionnan buscando e apoyo ey.

Pero un incidente cu a sucede durante un di e encuentronan ey a trece dilanti un



diferencia entre e Consejo Presidencial di Transicion (CPT) y e oficina di e prome minister, Garry Conille.

Ta trata di e encuentro realisa dialuna ultimo entre Conille y e presidente di Brasil Lula da Silva, cual a genera un protesta di parti di e miembro di CPT, Leslie Voltaire, ken ta na New York den representa-

cion di e presidente di e entidad ey, Edgar Leblanc Fils, debi na retraso di su biahe.

A informa cu a impedi e paso di Voltaire pa dicho reunion, a pesar di alega cu e tabata representante formal di Haiti.

Segun e medio di comunicacion Haitiano Le Nouvelliste ta indica, mientras combersa-

cionnan cu porta cera tabata desaroya pa mas di 15 minuut entre e presidente Brasileiro y e prome minister Conille, Leslie Voltaire a presenta na e sede di e representacion di Brasil y a dirigi su mes na e sala unda e reunion tabata tumando luga, pero a keda impedi di drenta pa agentenan di seguridad Brasileiro, pues e tabata viola e protocol di e luga.

Voltaire a splica nan, den Frances y Portugues, cu e ta e presidente di Haiti (pasobra e tabata acudi den representacion di e presidente di CPT, Edgar Leblanc Fils) y cu e tabata desea di participa den e encuentro, pero e agentenan Brasileiro a splica Voltaire cu nan no tabata sperando ningun otro participante den e reunion.

“A manda un agente di seguri-

dad pa comproba cu e funcionarionan Brasileiro cu tabata aden si nan tabata sperando Voltaire. Respuesta negativo. E agentenan ainda a busca riba Google y a informa Voltaire cu su nomber no tabata aparece den e resultadonan di buskeda di presidente di Haiti,” Le Nouvelliste ta señala y a indica cu e asesor presidencial mester a bandona e sitio.

Despues di su percance cu e protocol Brasileiro, Voltaire a denuncia na medionan di comunicacion “un golpi di Estado diplomatico” y a bisa cu e diplomacia ta un campo cu na Haiti ta coresponde na e aspecto presidencial.

Segun Voltaire e prome minister no mester preocupa pa e diplomacia. “Cabesnan ta bay lora” el a menasa.

Plataforma feminista Cubano ta denuncia publicacion di noticia falso tocante feminicidio riba rednan social

(CiberCuba) - Plataforma YoSiTeCreo na Cuba a denuncia e publicacion pa hende cu nan a cualifica manera “sin escrupulo of cu un plan desinformador” di e asesinato di un muhe den fin di siman ultimo na Matanzas.

“Esaki no ta e prome biaha cu e observatorionan ta enfrenata “noticia falso” cu tambe a wordo denuncia den situacionnan di desaparicion di muhe y muchanan,” nan ta splica den nan comunicado comparti riba e red social

Facebook.

Sinembargo, nan ta notifica cu den e oportunidad aki tabata prome biaha cu e persona cu a wordo declara como e victima a contesta pa desmenti e informacion cu tabata circulando.

“Mirando e gravedad di e asunto, nos ta recorda cu e observatorionan OGAT y di YSTCC ta wordo dirigi pa un metodologia comproba na observatorionan rond mundo, pa evita cay den manipulacionnan y hasta chansanan

di hopi mal gusto cu un problema asina sensibel manera feminicidio y desaparicion di muhe-, mucha- y hobenan,” nan ta aclaria.

Di mesun manera nan a adelanta cu nan ta mantene e vigilancia den varios caso, “di cual algun tin te hasta tres luna den e categoria ey pa falta di tur e elementonan necesario.”

Nan a informa cu, pa motibo di falta di pruebanan a elimina un investigacion di e provincia di Matanzas, pero nan

ta sigui traha den un caso di Las Tunas, Camaguey, Guantamo y Matanzas, respectivamente.

“E obhetivo di e observatorionan ta registra e violencia feminicida na nos pais, den buskeda di e prevencion y sistematizacion di un problema cu ta rekeri un abordahe integral urgente,” nan a reafirma den un contexto unda e tipificacion di feminicidio no ta reconoci pa e gobierno Cubano.

Scondi tras di argumenta-

cionnan semantico, e totalitarismo comunista dominante na Cuba ta evita papia di e violencia di genero cu e terminologia usa y acepta internacionalmente pa tur pais cu ta reconoce e existencia y ta combati e plaga aki.

Tocante e tema, e gobernante Miguel Diaz-Canel a hustifica esaki manera un construccion di loke e ta yama “plataformanan subversivo anti-Cubano”, kendenan e ta acsua di “imponer e idea cu na Cuba ta existi e feminicidio, termino cu ta indica supuesto inaccion estatal dilanti hechonan violento pa rason di genero.”

Den luna di september, te cu aworaki, a informa di varios caso di e tipo aki, den cual e muhenan, specialmente mamanan, a perde nan bida.

Na mita di luna tabata e hoben Arianni Cespedes ken a wordo asesina na man di su ex pareha, na su cas. Of esun di Annelis Hernandez Puerto di 47 aña di edad ken a wordo asesina pa su pareha dia 19 di september na su cas tambe.

Tambe tabatin e caso di un Cubano residente di Campo Florido, ken a wordo agredi cu machete pa un homber y ta den estado critico.



Yiunan di Kim Porter ta bisa cu e no a skirbi memoir tocante Diddy



(AP) - Aunke e ta un di e bukinan miho bendi na Amazon, e difunto Kim Porter no a skirbi su memoir detayando un relacion abusivo cu su pareha Sean 'Diddy' Combs, su yiunan a declara den un comunicado diamars.

"Kim's Lost words: A Journey for Justice, from the other side..." a ser independientemente publica riba Amazon den comienso di september, mas o menos un siman prome cu Combs su

detencion na New York y e revelacion di un acusacion formal den su contra. Ta acusa cu esaki ta basa riba Porter su diario y notanan.

Porter su yiunan, Quincy, Christian, Jessie D'Lila a denuncia e buki como un fabricaicon completo den un declaracion colectivo publica riba instagram diamars atardi.

"E alegacion cu nos mama a skirbi un buki simplemente no ta berdad. E no a haci esaki y cualkier persona bisando

cu nan tin un manuscrito ta mal representando nan mes," e declaracion a bisa. "Cualquier persona cu yama su mes 'amigo' y ta papia di parti di mi mama no ta un amigo ni tampoco nan tin su interes den curason."

Christian, Jessie y D'Lila ta Porter y combs su yiunan y Quincy ta yiu di Porter di un relacion anterior, sinembargo el a ser cria en gran parte pa Combs. Nan declaracion ta e prome cu nan a haci desde cu Combs a keda deteni, y nan

no a directamente papia tocante e caso criminal den us contra.

Probabel den respuesta di e buki su supuesto detayenan di violencia cu Combs a comete contra Porter, e muchanan a bisa cu e cantidad di "rumor-nan falso y dañino" cu ta circulando tocante nan mayor su relacion a causa cu nan a papia tocante esaki.

Porter a fayece di pneumonia den november 2018 cu 47 aña di edad, segun su autopsia, cual a determina cu el a fayece di causanan natural. Na momento cu el a fayece, Combs a bisa cu su persona y e ex modelo y actris tabata "mas cu miho amigonan" y "mas cu conecta den alma".

E buki ta bisa den su seccion di 'disclaimer' cu 'foul play' ta responsabel pa Porter su fayecimento. Su yiunan a bisa cu nan ta "lamenta profundamente cu mundo a haci un espectáculo di loke ta e evento mas tragico di nos bida," notando cu su causa di morto a keda estableci pa añanan y no tabatin ningun foul play.

Yena cu eronan den gramatica, un bista di e buki cortico ta detaya abuso fisico, coercion sexual y otro actonan di violencia cu supuestamente combs a haci. E buki di 22 dollar tabatin un lansamento keto riba Amazon, sinembargo a aumenta den benta despues di Combs su detencion y e detayenan impac-tante di su acusacion formal. El a yega e posicion number 1 rapidamente, sinembargo a cay den posicion caba.

E autor di e buki ta nombra como Jamal T. Millwood, skirbiendo "pa Kimberly A. Porter." E autor tras di e buki ta Todd christopher Guzze,

ken ta usa e nomber Chris Todd y ta defini su trabao como un "productor, autor y reprotero investigativo."

Den un entrevista via telefon cu The Associated Press diaranson, Todd a bisa cu el a ser acerca pa person-anan "hopi cercano na Kim y sean Combs" kendenan a provee su persona cu un "flash drive, documentonan y grabacionnan" di Porter cu eventualmente el a pega na otro pa crea e memoir den un proceso di lunanan largo.

"Mi a dicidi despues di mi investigacion y tambe cu mi investigadornan priva, cu e flash drive, documentonan y grabacionnan ta real. Y mi a dicidi pa Kim Porter bini dilanti y publica su memoir," Todd a bisa.

Den respuesta na e yiunan su declaracion, Todd a bisa cu su "porta ta habri" pa cualkier miembro di e famia comunica directamente cune. "Mi tasinti malo pa nan y mi tin simpatia cu henter e situacion y nan por acerca na mi persona directamente si nan kier," el a bisa.

Todd a bisa tambe cu e "un bos pa esnan cu no tin bos" y a urgi esnan cu tin duda pa "haci nan investigacion tocante ken e ta" y mira na casonan anterior cu el a traha riba dje.

Todd su pagina di YouTube, Chriss Todd Investigates, tin episodionan estilo podcast y audiobook video, hopi cual ta detaya teoria tocante O.J simpson, Nicole Brown Simpson y Ronald Goldman. Todd a bisa cu el a traha riba "varios caso famoso" y cu esaki "no ta su prome biaha."



LABHOH O'STAD TA MUDA

DESDE 30 DI SEPTEMBER 2024
LABHOH ORANJESTAD (DILANTI DVG) TA MUDA.
PERO NOS SEMPER T'EY NA E SIGUIENTE LOCALIDADNAN:

Prikpost Piedra Plat



Dialuna pa diabierna
6:00 am - 12:00 pm / 1:00 pm - 3:00 pm
(tur servicio) • Tel.: 527 4475

Prikpost HOH



Dialuna pa diabierna • 7:00 am pa 4:00 pm
(tur servicio) • Tel.: 527 4901

Prikpost Ponton



Dialuna pa diabierna • 7:00 am pa 12:00 pm
(solamente saca sanger) • Tel.: 527 4901

Prikpost San Nicolas



Dialuna pa diabierna • 6:30 am pa 11:00 am
(tur servicio) • Tel.: 280 7711



NOS SEMPER T'EY!

Studiantenan di Xavier University cosechando experiencia na Santa Rosa

Den un estrecho laso di cooperacion y palabracion haci den pasado Departamento di Agricultura, cria y Pesca Santa Rosa a haci cu Xavier University durante di e siman aki Departamento di Agricultura, Cria y Pesca Santa Rosa tabata tin e placer di ricibi bishita di studiantenan di Xavier University. E studiantenan aki ta di e facultad di Veterinario cu ta na encargo di dr. Ravindra Veeranna decano na Xavier University. Nan ta cinco estudiante cu ta den nan prome aña studiando pa Veterinario.

Ta conoci cu Santa Rosa mes no ta disponi di un veterinario den cas pa trata cu nos bestianan na momento cu na haya un of otro dificultad malestar. Ta pa e motibo aki a conecta e laso di cooperacion aki hunto cu Xavier University caminda e studiantenan aki por cuminsa haya nan experiencia con pa atende cu bestianan aki cu tanto Cabrito, Carne y Baca. Aki na San-

ta Rosa nan a wordo ricibi pa Sr. Edward Berben encarga cu seccion di Crianza di Bestia. E guia cu nan a ricibi ta manera entre otro con pa identifica edad di e bestia via di su djentenan.

Identificacion di postura via di su lomba, controla via bariga cierto malestar y asina por sigui menciona. Nan estudio como veterinario lo contribui grandemente cu nos departamento pa cual ta regarda crianza di bestia aki na Santa Rosa. Esaki lo ta e combinacion perfecto pa nan por haya experiencia tratando cu nos bestianan y nos lo por haya tambe nan experiencia como estudiante di veterinario na momento cu nos por tin un of otro dificultad cu malestar di un di nos bestianan. Nan lo por yuda guia nos con pa atende na momento cu un malesa presenta. Ki tipo di tratamiento e bestia mester. Con pa haci esaki na un mihor manera. Con pa combati cierto malesanan di plama y/of preveni esaki na nos bestianan. Esaki sigur lo yuda nos



departamento y nos por comparti tur e informacionnan aki cu nos criadonan di bestia local. Comparti conocimiento pa un mihor cuido y crianza di bestia.

Di parti di Departamento

di Agricultura, Cria y Pesca Santa Rosa nos palabra di gratitud na Xavier University pa e bon cooperacion cu nos ta ricibi y deseando e studiantenan tur clase di exito den nan studio como veterinario. Nos ta sigur cu nos por sigui

conta riba e lasonan estrecho aki di cooperacion di cual ta na beneficio di tanto e studiantenan y nos departamento y contribui cu Sector Primario di Aruba educando nos criadonan local.



DESDE 1 DI JULY 2024 CONFORME LEY,
ARUBA WASTEWATER SUSTAINABLE SOLUTIONS
AWSS
TA ENCARGA CU RWZI NA ARUBA.

RWZI
SYSTEMA DI RIOOL
PLANTA NAN DI PURIFICACION

Pa mas informacion:

www.awss.aw |
 [AWSS](#) |
 info@awss.aw

280-0436

Aruba Wastewater Sustainable Solutions

A revolution in sustainable wastewater solution

Delegacion di Landamento Artistico di Aruba a conkista 30 medaya den CARIFTA

Diahuebs ultimo, Minister Endy Croes a ricibi e delegacion di Landamento Artistico cu a representa Aruba recientemente na diferente competencia internacional. E atletanan a comparti nan experiencia na CARIFTA, PanAM Champs y Junior World Championships cu e mandatario di Deporte. E seleccion a conkista 30 medaya: oro, plata y brons na CARIFTA.

Head Coach di Aruba Artistic Swimming Sra. Kimberly Vinck a indica cu e aña a inicia hopi bon cu e competencia preparatorio na CARIFTA cu



a tuma luga na Fort Lauderdale, Florida. Despues a competi den PanAM Champs cu a tuma luga na Lima, Peru y a participa den Junior World Championships, cu e meta pa e atletanan por crece y haya experiencia specialmente awo cu e deporte ta den e fase di transicion grandi. E reglanan ta cambiando y a wordo restructura. Ta hopi importante

pa e atletanan sigui siña”, Sra. Vinck a enfatisa.

Por ultimo, e mandatario di Deporte ta felicita y gradici e atletanan pa nan bunita trabou y pa pone Aruba su

number briya riba e plataforma internacional. “Masha pabien y hopi exito den futuro competencia di natacion artistico,” e mandatario di Deporte a conclui.



Aruba Basketball Bond

Seleccion U15 Den ful preparacion pa torneo na St Maarten

Aruba Basketball Bond su seleccion U15 ta den ful preparacion pa participa na e Paradise Showdown Tournament cu lo tuma luga na St Maarten. E wega di fogueo a tuma luga na Aruba Juniors cual por cierto tabata basta yen cu famia, amigo y fanaticonan di basketball.

E torneo ta organisa pa Performance Sports Academy Athletic Association. E meta principal di e torneo ta pa cada hungado demonstra su habilidad y crea exposicion pa e hoben atleta hungando contra e miho hungadonan di cada pais cu ta participa na e torneo. E torneo lo tuma luga di 5 pa 10 di October 2024. Aruba ta den Pool A hunto cu St Maarten, St Kitts y Saba. Aruba lo tin e honor di hunga e wega di apertura contra St Maarten. Earl Clemencia ta e Head Coach y ta wordo asisti



pa Starlin Arismendy.

Diadomingo cu a pasa nos seleccion a hunga un wega di fogueo contra e team di cadet di Aruba Juniors. E wega a

cuminsa cu Seleccion hungando un wega lihe cu a causa algun perdida di bala. Aruba Juniors ta probecha di e erornan y ta saca un bentaha di 12-8 den e prome kwart

di wega. Den e di dos kwart coach Earl a haci algun cambio y a duna instruccion na e hungadonan.

Seleccion tabatin menos perdida di bala y a forma ataknan organisa pa Denzell Dirksz y Dempsley Brice pa yega y score na e basket defendi pa Aruba Juniors. Half-time ta bay aden 48-35 pa Seleccion U15. Den e di dos tempo Seleccion a sali motiva pa “seal” e wega hungando presion riba ful e cancha. Aruba Juniors tabatin problema pa defende e presion y tabata comete perdida di bala. Seleccion a probecha di esaki y tabata haya tironan facil un tras di otro pa asina gana e kwart 21-13. E ultimo kwart seleccion a sigui presiona y ta score 23 punto pa gana e wega cu score di 71-49. Dempsley Brice, Denzell Dirksz y Jaydrick Maduro tabata e top-scoringnan cu 19, 17 y 12 pun-

to respectivamente. Dempsley Brice y Cesar Arismendy tabata e miho reboteran cu 10 y 9 cada un. Briant Jansen, Jayderick Maduro y Jonathan Yepes tabatin 8, 6 y 4 steal respectivamente. Coachnan Clemencia y Arismendy por mira atras riba un wega satisfactorio di nan seleccion y nan tin confiansa cu nan lo haci un bon papel na St Maarten.

E wega di fogueo a tuma luga na Aruba Juniors cual por cierto tabata basta yen cu famia, amigo y fanaticonan di basketball

Diadomingo awo 29 di September 2024 lo tin e ultimo wega di fogueo. Esaki lo ta contra un seleccion forma pa hungadonan di Cadet di Stealers y Aruba Juniors. E wega ta cuminsa 6or atardi. Carchi ta obtenibel cerca e hungadonan di seleccion of

Trabaonan di mantencion na tur facilidad di FFD



Directiva di Fundacion Faciladnan Deportivo (FFD) kier a subraya e hecho di ta trahando duro riba mantencion di e facilidnan resorta bao di

FFD. Pueblo deportista por ta sigur cu tur facilidad ta hayando nan debido atencion.

Segun a indica den un comunicado di prensa, adrecha varios facilidad caba y e trabaonan di mantencion ta continuando, cual ta exige hopi atencion. Ta hopi trabao di mantencion y limpieza tin andando. Bestuur di FFD ta garantisa di ta dunando tur facilidad atencion.



Serie di Aaron Hernandez, 'American Sports Story' kier mustira un bista diferente di e atleta di NFL

(AP) – For di un podcast te varios documental, e ascenso y caida di strea di NFL, Aaron Hernandez sigur ta bon documenta. Un serie limita di FX ta e mas recien den trece back e saga, purbando di bay mas leu cu e titularnan y bay mas profundo den su storia.

"American Sports Story: Aaron Hernandez" ta conta cu actuacion di Josh Andres Rivera como e tight end di e New England Patriots. E ta detaya e infancia dificil di Hernandez cu un tata abusivo cu a exige su yiu hunga futbol y proyecta masculinidad y forza den mundo. Secretamente, Hernandez tambe tabata lucha cu su sexualidad.

El a hunga na Universidad di Florida y a keda drafted pa e Patriots. Durante tempo, e serie ta mustira con comportamiento di Hernandez a bira cada bes mas eratico. El a keda condena di morto y a muri di suicidio na 2017 mientras tabata cumpli sentencia di bida largo. Despues di su morto, investigacion a mustira cu cerebro di Hernandez a mustira evidencia di encefalopatia traumatico cronico, CTE. Bida, crimen y morto di Her-



nandez ya a keda detaya den buki, documental incluyendo "Killer Inside: The Mind of Aaron Hernandez" riba Netflix, y e podcast "Gladiator: Aaron Hernandez y Football Inc.," cual ta e base pa "American Sports Story."

Rivera, conoci pa su rolnan di sosten den e precuela recien di "Hunger Games" y "West Side Story" na 2021, a bisa cu interpreta e ex-tight end tabata un "responsabilidad cu bo mester aborda cu cierto nivel di sensibilidad."

Unabes el a cuminsa siña mas tocante bida di Hernandez, buscando grabacion di yamada cu el a haci for di prison

y mirando clip di su entrevistanan, Rivera a bisa cu el a cuminsa bira con complica e bida di Hernandez tabata. Y el a haya mas gana di interpret'e.

River a bisa cu el a disfruta e reto di trabao di personahe, yamando Hernandez "un camaleon."

Transforma den Hernandez tambe tabata un compromiso fisico pa Rivera, kende a describi bin den forma di NFL como un "meathead summer" unda el a aumenta su consumo di cuminda y a traha cu trainer pa construi musculo.

Sinembargo, pa Rivera, e par-



ti mas dificil tabata tatuaje. Su movilidad hopi biaha tabata limita durante filmacion pa preserva e tatuahenan, pero na final, e "sentimento opresivo" di no por move libremente ta algo cu el a canalisa den e frustracion di su personahe.

Rivera ta actua hunto cu Jaylen Barron como e pareha di scol secundario di Hernandez kende despues a bira su prometida, Shayanna Jenkins; Lindsay Mendez como su prima; Ean Castellanos como su ruman homber y Tammy Blanchard como su mama.

Patrick Schwarzenegger ta interpreta e compaño di

team di Hernandez, Team Tebow; Tony Yazbeck ta interpreta ex-coach di Florida, Urban Meyer y Norbert Leo Butz ta interpreta ex-coach di Patriots, Bill Belichick.

Cu e prome temporada enfoca riba sport di e frankisia "American Story," productor nan a bisa cu nan ta interesa den disecciona e "religion Mericano di futbol." Nan tambe ta spera cu publico lo cuestiona e prehuicionan cu nan tabatin di hende involucra den storianan cu a captiva e nacion, manera esun di Hernandez.

Son Heungmin ta e futbolista top cu mas recien a expresa preocupacion pa schedule

(AP) — Delantero di Tottenham, Son Heungmin a bira e strea di futbol cu mas recientemente a expresa preocupacion tocante e cantidad di wega cu ta exigiendo e futbolistanan hunga.

E internacional Sur Koreano a bisa cu tabatin un riesgo "masivo" di lesion pa hungadornan enfrentando e exigencia poni riba nan.

Su comentarionan a yega despues cu centrocampista di Manchester City, Rodri a bisa siman pasa cu hungadornan tabata cerca di tuma accion di welga. Dianan despues, Rodri a sufrí daño na ligamento di su rudia.

"Bo no kier mira hungadornan sufriendo cu lesion. Niun hende kier mir'e," Son a bisa ayera. "Hopi wega, hopi biaha. Nos mester cuida nos mes, cu tin biaha ta hopi



dificil. Mental-, fisicamente, bo no ta cla. E ora subi cancha y e riesgo di lesion ta masivo. Nos no ta robot. No tuma mi na malo, nos ta stima hunga futbol. Esey ta claro."

Rodri tin daño di ligamento na su rudia banda drechi, City a bisa diaranson sin duna un cronograma pa su ausencia potencial. El a keda lesiona

durante un wega di City den Premier League contra Arsenal diadomingo ora tabata luchando cu Thomas Partey den e caha na un skina.

Son a bisa cu e ta di acuerdo cu comentarionan di Rodri. "Rodri a bisa cosnan corecto. Nos ta hunga 50, 60 wega y no mas cu 70 wega. Ora e partidonan bin, e hungador-

nan mester hunga. Tin hopi cos pasando," el a bisa. Siman pasa, manager di City, Pep Guardiola a bisa cu ta keda na hungadornan pa forza un cambio den futbol despues di e disputa crecien- do tocante e schedule preta. Champions League a expande e temporada aki cu dos wega mas den e etapa di grupo nobo. E Cup Mundial di

Club expandi di proximo aña na Merca ta bay ta un evento di 32 team pa prome biaha, un aumento for di siete. E ta programa pa e offseason di hopi liga na juni-juli.

E formato nobo di Cup Mundial di Club a genera un reto legal di sindicatonan di hungador. Manager di Tottenham, Ange Postecoglou a bisa cu e hungadornan por tuma un posicion. "Nan por tuma e asunto den nan propio man. Nan ta esunnan mas afecta pa ta honesto, pues bo lo compronde si nan cuminsa pensa como colectivo, con hopi nos mester keda sin tin nada di bisa continuamente?" Postecoglou a bisa. "Mi a papia caba tocante e hechoc u nos ta yegando na un nivel realmente peligroso tocante kico nos expectativanan ta rond di e hungadornan. Na lugar di enfoca riba un of dos torneo, e ta bay pa e kalender. Esey ta mas e problema."

Ehecutivo di OpenAI Mira Murati ta bisa cu e lo sali for di e compania di inteligencia artificial



(AP) - Un ehecutivo di rango halto na OpenAI cu a eherce pa algun dia e funcion di CEO interino durante un periodo di problema aña pasa a bisa cu e lo sali for di e compania di inteligencia artificial.

Mira Murati, OpenAI su hefe di tecnologia, a bisa den un declaracion por escrito di aranson cu despues di hopi reflexion el a tuma e deci-

sion di “sali for di OpenAI.”

“Mi ta retirando pa motibo cu mi kier crea tempo y espacio pa mi propio exploracion,” el a expresa.

Esaki ta e caso mas recien di cambio den liderazgo na e compania. Su president y co-fundador, Greg Brockman, a bisa den augustus cu e lo “tuma un break” te cu fin di aña. Otro co-fundador, Ilya Sutskever, ken a lidera un ekipo enfoc riba seguridad di AI a sali den mei y a cuminsa su propio compania di AI.

Dianan despues cu Sutskever a sali, su co-lider di ekipo di seguridad Jan Leike tambe a retira y a hiba critica contra OpenAI pa laga seguridad tuma un “di dos asiento tras di productonan briyante.”

Murati a papia di manera positivo tocante e compania y su CEO Sam Altman den un



nota di salida na su coleganan cu a ser comparti riba rednan social, cua lta describi esaki como “e punto central di inovacion di AI” y bisando cu e ta dificil pa laga un luga cu bo ta balora.

Altman despues a contesta Murati su publicacion riba X y a expresa su gratitud pa su servicio na e compania.

“E ta dificil pa comenta con hopi Mira ta nifica pa Ope-

nAI, nos mision y nos tur personalmente,” el a skirbi. Altman tambe a bisa cu e compania lo provee mas informacion tocante e transicion di liderazgo den e dianan binidero.

Prins Harry ta bisa cu dañonan di rednan social a causa un ‘epidemia’ pa awendia su hubentud

(AP) - Prins Harry a bisa cu awendia su hubentud ta den medio di un “epidemia” di ansiedad, depresion y isolacion social a causa di e experiencianan negativo online, mientras e tabata trece dilanti su campaña pa yuda muchanan y nan mayoran nabega espacionan cibernetico den e siman aki su Clinton Global Initiative.

“E plataformanan aki ta disena pa crea adiccion,” Harry, di 40 aña, a bisa den remarca riba diamars na New York City. “Muchanan hoben ta manteni ey pega ta keda consumi contenido cu ningun mucha mester por wak. Esaki no ta haci conscientemente.”

Mas cu sostiene mayornan y hubentud durante e periodo aki, e Duke di Sussex a enfatisa e necesidad pa responsabilidad corporativo. El a puntra dicon e lidernan di companianan di rednan social poderoso te ainda “ta cumpli cu e standardnan mas abao” y a haci yamado na shareholdernan pa exige cambio tangibel.

“Cria un yiu no ta caba cu e nacemento di e mucha. Ni tampoco funda un compa-

nia,” el a bisa, mientras el a revela cu su lock screen ta un potret di su yiunan. “Nos tin un responsabilidad y trabao di cuida di nos creacionnan.”

Harry su remarcanan ta yega mientras cu presion ta sigui aumenta riba gigantenan di tecnologia manera Meta, Snap y TikTok pa haci nan plataforma online mas safe, particularmente e usuarionan mas hoben. Varios mucha riba e plataformanan aki ta exponi na contenido cu no ta apropiado pa nan edad, manera violencia, of mal informacion. Otronan ta enfrenta standard di beyesa cu no ta realistico, bullying y acoso sexual.

Companianan a haci algun cambio durante e añanan, cu Instagram por ehempel anunciando siman pasa cu e lo haci e cuenta di hobennan automaticamente priva den cierto pais. Sinembargo esnan cu ta boga pa seguridad a argumenta cu tin mas trabao pa haci. Tambe e ta mantene cu e companianan ainda ta pone demasiado responsabilidad riba e mayornan ora ta trata mantene nan yiunan safe riba rednan social.

Harry su contribucion na e aña aki su reunion anual di

CGI tabata forma parti di “what’s Working”, den un panel cu ta inclui ex president Bill Clinton, Clinton Foundation su vice presidente Chelsea Clinton y World central Kitchen su fundador Jose Andres.

Archewell Foundation, cual Harry a funda cu su casa Meghan Markle, pa ehecuta nan trabao filantropico, recientemente a lansa un iniciativa cu ta sostiene mayornan kendenan su yiunan a sufri of fayece a causa di dañonan di rednan social. Harry a enfatisa e trabao di e iniciativa aki, yama The Parents Network den su speech diamars.

E fundacion tambe a partner cu World Health Organization y otronan pa caba cu violencia contra muchanan, un problema cu su persona y Meghan a delinea durante un trip recien na Colombia. Riba diamars tambe el a señala na un conferencia inaugural Global Ministerial Conference tocante caba cu violencia contra muchanan, cual lo tuma luga na Bogota den november. El a bisa cu e reunion aki por resulta den e prome acuerdo global cu ta duna prioridad na seguridad y proteccion online.



Su speech tabata parti di un cadena di presentacion di Harry na New York dirigi na e cantidad di eventonan

humanitario y filantropico cu ta tumando luga banda di Nacionnan Uni su siman di asamblea general.

Auto a dal hoben crusando e Green Corridor dilanti airport



Diamars net prome cu merdia a drenta informe di un accidente cu hende herida dilanti airport riba e Green Corridor, mesora

a dirigi tanto polis como ambulans na e sitio.

Na yegada di e patruya a bin compronde cu aki ta trata di

un accidente unda cu e auto a dal un hoben peaton cu a crusa sin pone bon atencion. Door di e impacto e hoben a haya basta sla na su cabes y na

yegada di e ambulans nan a atende y mester a transporte cu hopi urgencia pa hospital, polisnan a cera e caminda pa asina evita e trafico pa am-

bulans. Un rato despues e chauffeur di e auto tambe a bira malo y mester a hib'e hospital tambe.

Despues di a accidenta cu auto, persona a dal su pia

Diamars atardi a drenta informe di un accidente na Santa Cruz, mesora a dirigi un patruya na e sitio.

Na yegada di e patruya a bin compronde cu aki ta trata di un accidente chikito unda un auto a reverse y a dal otro auto. E daño tabata minimo, pero ora e dama a bay pa yena e formulario ela dal su pia, mesora e personal di Forensys a yuda e dama cu pone ijs na e pia. E dama a keda di bay dokter despues.



Pareha turista herida ora cu UTV a bolter na subida di lighthouse



Diamars merdia a drenta informe di un accidente cu hende herida na e subida di lighthouse, mesora a dirigi tanto polis como ambulans na e sitio.

Na yegada di e patruya a bin compronde cu un pareha turista lo a bolter cu un UTV y e pareha victima tabata ser transporta den un otro UTV y ora a topa e ambulans nan a atuma e victimanan over y a transporta nan pa hospital.

Yiu di 24 aña ta lanta contra su mama

Dialuna anochi a drenta informe di cu tin un yiu di 24 aña ta lantando contra su mama na San Barbola, mesora a dirigi un patruya na e sitio.

Na yegada di e patruya a bin compronde cu e mama a hala atencion di e yiu pero esaki a lanta vos contra e mama. Polis a papia cu ambos y e situacion a cambia.



Chauffeur di pick-up cu no a regula su velocidad ni a mantene distancia a bay dal tras di otro pick-up na Ayo

Dialuna atardi a drenta informe di un accidente na Ayo, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e chauffeur di un pick-up no a regula su velocidad ni a mantene distancia a bay dal tras di otro pick-up. Afortunadamente ningun hende a resulta herida.



Den cura auto a reverse dal mucha di 2 aña



Diamars mainta a drenta informe di un accidente cu hende herida den un cura na Alto Vista, mesora a dirigi tanto polis como ambulans na e sitio.

Na yegada di e patruya a bin compronde cu un auto tabata reverse den un cura y a bay dal sin sa un mucha di 2 aña cu tabata patras di e auto. Na yegada di e ambulans nan a atende e mucha y a transporte pa hospital.

Polis a bay na Pos Chikito pa un problema

Dialuna anochi a drenta informe di un problema na Pos Chikito. Mesora a dirigi un patruya na e sitio.

Na yegada di e patruya a bin compronde cu aki ta trata di un problema di pareha pero e partidonan ya lo a bandona sitio.




Polis a bay pa un persona drumi banda di caminda na Shiribana



Diamars madruga a drenta informe di cu tin un homber drumi banda di caminda na Shiribana, mesora a dirigi un patruya na e sitio.

Na yegada di e patruya a bin haya un persona feliz feliz y a lante y a subi den e vehiculo di transporte y a bay cun'e.



Comunidad invita pa participa na e consulta publico riba e concepto di Ley pa Bienestar di Animal

Den cuadro di e vision pa mehora e bienestar di nos animalnan na Aruba, Ministerio di Transporte, Integridad, Naturalesa y Asuntonan di Adulto Mayor ta trahando ariba e ley nobo "Landsverordering Dierenwelzijn". E ley aki tin como meta pa sigura e bienestar y cuida pa nos animalnan domestico.



Desde algun siman a sinta cu diferente stakeholders pa asina ricibi feedback y comentario ariba e contenido di e concepto di ley aki. A sinta cu entre otro veterinarianan, Centro Control di Cacho, DIVV, diferente fundacionnan y otro stakeholders cu ta aporta den e area aki.

A ricibi hopi bon comentario ariba e concepto di ley y awo ta den e fase di consulta publico.

Consulta publico a habri desde 18 di september y ta continua te cu 28 di september 2024. Cada ciudadano por comparti nan punto di bista

y sugerencianan riba e concepto di ley aki.

Con pa participa na consulta publico?

Online via www.publico.aw/ consulta caminda por download e concepto di ley y su "memorie van toelichting" y click ariba e formulario digi-



tal pa asina yena esaki online. Participa na e consulta publico cu lo tuma luga diahuebs awo dia 26 di september na MFA paradera cuminsando for di 6pm te cu 7pm.

E ta importante pa ricibi comentario di ciudadanonan riba e concepto di ley aki, mirando cu e ta bay tin efecto ariba henter e comunidad. E ta bay rekeri cambianan den pensamiento y mas importante cambianan den comportacion di ciudadanonan.

Minister Ursell Arends ta keda boga pa mehora e bienestar di nos animalnan

na Aruba y un di e pasonan grandi den e direccion aki ta e ley pa bienestar di animal. Ademas participacion activo di comunidad den ley y manejo ta contribui na un sistema mas transparente y sigur. Ta gradici tur esnan cu a participa y contribui na proceso aki.

Invitacion ta bay na comunidad henter pa participa na e consulta publico cu ta tuma luga dia 26 di September 2024, di 6'or di atardi pa 7'or di anochi na MFA Paradera, y asina por comparti puntonan di bista ariba e concepto di ley aki.


Entrante 26 di september 2024 vacuna di Influenza ta disponibel pa tur 60+ gratis

E vacuna di Influenza of tambe conoci como grieprik ta disponibel pa e grupo den comunidad cu ta na riesgo di bira hopi malo debi na Influenza. E grupo aki ta consisti di e adulto mayor di 60 aña of mas y tambe di personanan menor di 60 aña pero cu ta sufri di un of mas malesa cronico. E adulto mayor di 60 aña of mas ta bin na remarke pa ricibi e vacuna di Influenza completamente gratis y NO mester di un recept di dokter di cas. E adulto mayor di 60 aña of mas cu ta desea di ricibi su vacuna di Influenza por 'WALK IN' na seccion di Malesanan Infecioso di DVG y na momento di presenta mester bin cu su carichi di AZV.





















E adulto mayor cu ta biba den instancianan di cuida lo wordo vacuna na e instancia di cuida mes. Personanan cu ta sufri di malesa cronico of nan salud ta debil pero NO tin 60 aña ainda tambe por ricibi nan vacuna completamente gratis, pero pa esaki si mester ricibi un recept di dokter di cas. Cu e recept e persona por 'WALK IN' na seccion di Malesanan





Infecioso di DVG. Na momento di presenta mester bin cu e recept di dokter di cas y tambe e carichi di AZV. Tur otro persona cu NO tin 60 aña y tampoco tin malesa cronico pero ta desea di ricibi e vacuna di Influenza por paga pa esaki na un costo di fl 20,- y alabes mester traha un cita entre dialuna pa diabierna for di 8:00 pa 11:45 di mainta of 1:00 pa 3:30 atardi. Pa mas informacion por tuma contacto cu seccion di Malesanan Infecioso na telefon 5224239 of 5224241. Pa keda semper bon informa Like nos Facebook page Directie Volksgezondheid DVG Aruba, Follow nos riba Instagram directie_volksgezondheid_aruba, subi nos website www.dvg.aw, yama nos na 5224200 of mail nos na servicio@dvg.aw

Resultado Sorteo September 25			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
1762	7592	9226	7670
1813	3036	SUPER5	7290
9677	4430	-	6711

MERDIA	ANOCHI		
--------	--------	--	--

 Sorteo # 4399 5065 6533 5144  X2  Sorteo # 4399 1210  X2  Sorteo # 2455 1732  Sorteo # 4399 1904 Libra  Sorteo # 1273 415  X2	 Sorteo # 8356 7732 9157 1564  FP  Sorteo # 7400 6703  FP  Sorteo # 2105 7906  Sorteo # 6159 4815 Cancer  Sorteo # 1089 061  FP	 Sorteo # 2530 0 x Jackpot 0 x Match 4+ 6 x Match 4 164 x Afl. 12,00  Sorteo # 6605 0 x Jackpot 2 x Match 4 140 x Afl. 8,00	08-20-21-27-35 Joker 31 Letter A Proximo Jackpot 140.000,- 01-02-16-20-21 Proximo Jackpot 71.000,-  Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 300.000,-  Afl. 400.000,-
---	--	---	---

 Sorteo # 	
---	---

**Cas Di Cultura**

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**

Irenestraat 21 Aruba
297-588-1179

**Fundacion Pa Nos
Muchanan**

Cumana 2 Aruba
297-583-4247

**Fundacion Tel Pa
Hubentud**

Wilhelminastraat 19
Aruba
297-588-6138

**Koningin Wilhelmina
Fonds**

Spinozastraat 9 Aruba
297-582-0412

Mary Joan Foundation

Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

**Stichting Fundacion
Guia Mi**

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081

**Dokter na warda**

Oranjestad San Nicolas
Hospital Imsan
7:00 pm / 10:00 pm 24 ora

Botica na warda

Oranjestad: San Nicolas:
Dakota Seroe Preto
Tel. 588 7364 Tel. 584 5119

EMERGENCIA 911

POLIS

Oranjestad 100
San Nicolas 104
Santa Cruz 105
Noord 107
Tip Line 11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
San Nicolas 584-5712
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

Servicio di Taxi**Aruba Transfer Tour &
Taxi C.A.**

Tel: 582 2116 / 582 2010

Taxi Adres Services (24h)

Tel. 587 5900

A1 Taxi Services Aruba

Tel: 587-8850
Tel: 280-2828
Whatsapp: 592-7024

Sesion virtual riba oportunidadnan na Washington DC

Dialuna, 30 september, **Minister Plenipotenciario na Merca, Sra. Zulema Dabian-Erasmus lo tene un sesion virtual pa un y tur interesa den oportunidadnan na Washington DC pa por enrikece nan carera profesional. E sesion virtual aki lo tuma lugar 9.00 a.m. EST pa asina duna posibilidad pa studiantenan na Hulanda join tambe. Mirando e diferencia di tempo, esaki lo ta 3.00 pm pa studiantenan na Hulanda. Pa por participa mester solamente registra pa haya e zoom-link.**

E sesion virtual ta brinda informacion valioso pa studiantenan na Merca, Aruba, Hulanda cu kier haya experiencia di trabou na Washington DC pa asina haci nan curriculum mas atractivo pa ora di busca trabou. E sesion aki tambe ta interesante pa profesionalnan na Aruba cu kier un cambio den nan carera y ta interesa pa scucha oportunidadnan di trabou na organisacionnan internacional.

Durante e sesion virtual lo tin presentacion di Worldbank y Inter-Amecian Develop-



ment Bank pa splica riba e asina yama 'internships' cu ta e manera pa drenta den e organisacionnan aki como profesional of recien gradua. Netherlands-America Foundation lo duna un presentacion di fondonan cu t'ey pa studiantenan di nacionalidad Hulandes pa haci un Master's degree na Merca y/of haci un Internship na Merca, incluyendo nan conocido DC Summer Internships. E profesional Arubiano na Organization of American States, Jennifer Molina Vrolijk, lo termina e sesion contando di su experiencia di internship na Washington DC despues di a gradua na Hulanda.

Por registra ainda pa e sesion virtual, Opportunities in DC, door di manda un e-mail pa was-gma@minbuza.nl of door di registra via e link aki: Opportunities in DC

Minister Plenipotenciario como e representante di Aruba na Merca, ta sostene Aruba y identifica oportunidadnan pa Aruba riba tur area. E ta traha na Embahada di Reino na Washington, DC. Un di su tareanan ta e capacitacion di hobennan. Merca ainda ta sinti como un pais caro pa studia y dificil pa stage. Sin embargo cu e informacion corecto kier muestra cu no mester ta asina. Ademá pa profesionalnan cu kier enrikece nan carera tin diferente oportunidad. Paisnan normalmente ta purba stimula presencia di nan profesionalnan den organisacionnan internacional, pasobra esakinan ta esunnan cu ta identifica oportunidadnan pa e desaroyo di nan pais.

Den pasado Minister Plenipotenciario a organisa un Peer-to-Peer Conversation hunto cu Education USA pa studiantenan cu ta bayendo Merca. Ademá a traha hunto cu Universidad di Aruba pa por a brinda studiantenan di OGM un programa completo durante nan bishita na Washington, DC na juni. E intencion ta pa brinda mas sesion di capacitacion.



Pronostico di tempo

**Tempo:**

Awe tardi y awe nochi: parcialmente nubla y generalmente seco
Den marduga y mañan: temporalmente hopi nubla cu un awasero local

Temperatura maximo 34 grado celsius
Temperatura minimo 28 grado celsius
Indice di calor (heat index) den y rond di oranan di merdia: 35 pa 42 grado celsius
UV index: 12

Bahada di solo : 6:33 pm
Subida di solo : 6:29 am

Biento:

Moder afor di direccionnan entre
Oost-noordoost y oost-zuidoost;
Forsa 3 te 4 (12 te 30 km/ora, 7 te 16 nudo).
Durante di dia basta fuerte den rafaga;
Forsa 5 (31 te 39 km/ora, 17 te 21 nudo)

**Situacion general di tempo
pa proximo 24 ora:**

Extension zwak di un area di presion halto lo sostene un biento modera den region. Un ola tropical ta acercando parti oost di Caribe y lo trece humedad den region durante e proximo dianan. Esaki lo induci un awasero local durante e periodo di pronostico aki.

**Condicionnan maritimo/
estado di lama:**

Na partinan protegi di costa: keto, rond di 1 pia.
Na partinan zuid: tranquil, 1 pa 2 pia.
Na partinan oost te noordwest di costa:
Modera cu olanan alrededor di 3 pa 4 pia

Aviso/ alerta:

Ta recomenda publico pa keda den sombra y cu suficiente awa debi na condicionnan di temperatura y humedad halto.

Adore Beauty Studio

ta busca
"Manicurista"
Por yama na
Tel. 566 4420

218357

Perfect Landscaping NV

tin mester di
"Hardinero"
Pasa personalmente pa jena un aplicashon na Fantastic Gardens Aruba NV.

218359

Fundacion Cas di Mi Chepa

Ta Busca
"Zorg Assitent" +
"Teamleider Zorg"
por yama na
Tel. 731 3366

218354

Oportunidad pa Trabou

Orion Security
tin mester di
"Security Guards" full time
por pasa aplica na J.G.
Emanstraat 79, pa mas
informacion por yama 583 8314

218349

Mihor Indian Astrologo

conoce di bo pasado, presente y futuro door di lesamento di bo man y bo cara
Tel. 747 0808

218336

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Señor ta mi Wardador, mi no tin falta di nada, den cunucu di yerbe berde E ta pone mi sosega.
E ta hiba mi na awa tranquil pa mi bolbe haya forsa. E ta guiami den caminda drechi fiel na su nomber.
Salmo 23 1-3

Cu inmenso dolor pero segun voluntad di Dios, nos ta participa fayecimento inesperadamente di nos
Mama, Wela, Bisawela, Ruman y Tanta:



Florentina Mathilda Dirksz
Mihor conoci como Ruby of Bibi
*15-12-1949 - †08-09-2024

Na nomber di su Mayornan:
† Mama: Seferiana Dirksz-Gomez. † Tata: Simon Dirksz

Yiunan:
Daniëlla Dirksz (Nela)
Grec Dirksz
Eddy Rijke (Pipo)

Yiunan di criansa:
Jesus Willems y Yiunan Zurriene Dirksz, Noulani Sedney,
Vivian Willems

Nieto y Nietanan:
Jardiella Tromp y pareha Quincy Rodriguez, Ian Tromp y
pareha Thyana Estrada, Jair Tromp, Isaiah Dirksz.
Su unico bisanieto: Jayvian Martis y su tata Wilkins
Manera un yiu: Gizzy Quandt. Yerno: Pedro Javier Tromp
(Poci)

Rumannan den feliz Memoria y na bida:

† Theresa Dania-Dirksz y Fam.
† Reina Dirksz y Fam.
† Cristobal Dirksz y Fam.
† Tina Tsu-Dirksz y Fam.
† Maria Dirksz de Lugo y Fam.
† Dora Dirksz y Fam.
† Margarita Dirksz
† Beatriz Leong-Dirksz y Fam.
Vda Martha Jansen – Dirksz y Fam.
† Norma Dirksz y Fam.

Rudolfo Dirksz y Martha Dirksz – van den Berg y Famia
Sobrinonan y Sobrinanan na Aruba, Hulanda, Primonan y
Primanan na Aruba, Hulanda, Merca, Boneiro y Paraguay
Iha: Tamara Theofiel. Compennan y Comennan, Tur su
Amigonan y Amiganan

Su bon amiganan di cas: Magali, Mirna, Julisan y Sylvia.
Bon Amiga di cas y manera un yiu: Uka Billups.

Demas Famia:
Dirksz, Tromp, Rijke, Willems, Gomez, Dania, Tsu,
Lugo, Lu, Leong, Maduro, van den Berg, Simileer, Piña,
Cordoba, Hoek, Charris Krozendijk, Sanchez, de Leon,
Storm Quintana, Neuman, Miranda, Werleman, Lacle,
Flanegin, Hart, Oudshoorn, Hengeveld, Martis, Everts,
Dirks, Sevinger, Orman, Quandt, Zievinger, Sambrano.
Tur Bisiñanan, y demas conocirnan

Acto di despedida lo tuma lugar 28 di september 2024 di
2'or pa 4'or di atardi na Aurora Funeral Home. Cremacion
lo tuma lugar den seno familiar.

Nos ta lamenta cu despues di despedida nos no por ricibi
bisita di condolencia na cas.

Nos ta pidi disculpa si den nos tristesa nos por a lubida di
menciona un of otro famia.

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Mi a lucha e bon lucha,
Mi a termina e careda,
Mi a warda e Fe.
2 Timoteo 4:7

Conforme voluntad di Dios, nos ta anuncia
fayecimento di:



Oscar Antonieto Wever
Miho conoci como "Buchi"
*05-01-1949 - †22-09-2024

Tata y Mama:
† Willem Wever
† Carolina Wever
Na nomber di:

Esposa:
Jenny Wever – Pieters
Yiunan:
Jean Paul y Chantal Konings
Walter y Kimberly Wever – Peterson
Zuleika Wever y Rodney van der Biezen
Tharick y Norrienne Wever – Tuijehut

Nieto(a) nan:
Priscilla, Kenneth y Quin;
Zinah, Wahkeem, Waylen y Wayne;
Zaidi, Zamirah y Zenelly;
Thyler y Mia.

Bisanieta nan:
Gentle, Genairo, Zayn

Rumannan:
† Marie de Cuba – Wever y famia
† Betty Wever y famia
† Ina Wever y famia
Antonieta (Chichi) y Shon A de Mey – Wever y famia
Nadi Wever y Vera Odor y famia
† Greta y Clifford Neuman – Wever y famia
Magda y Carl Wauben – Wever y famia
Sua y Cuñanan:
† Edsel y Mary Pieters – Deher
Leo y Swinda Pieters – Oduber
Sandra y Darren Antonie-Pieters
Robby y Auritha Pieters-Brokke

Nos como famia ta gradici su kerido Pastor Gilbert Martes y
esposa, liderazgo y rumannan di Iglesia Emmanuel cu a para
cu nos den e momento nan dificil.

Un danki special na su ayudante Tania Ramirez, su dokter di
cas M. Ho Kang You y su assistent Jennifer.

Alabes nos ta invita tur famia, amistadnan, bisiña, conocirnan,
su ex-coleganan di Landslaboratorium y Laboratorium
Familiar, rumannan di Iglesia Emmanuel.
Tur su sobrinu/anan, su ihanan y demas famia Wever, Pieters,
Konings, Antonie, Peterson, Tuijehut, Hernandez, de Mey,
Brokke, Martes, Oduber, van der Biezen, de Cuba, Neuman,
Wauben, Nassy, Eidsen, Martis
Ta invita pa asisti na acto di condolencia cu lo tuma lugar
na Aurora Funeral Home diahuebs 26 di September di 7
pa 9 or di anochi y entiero cu lo tuma lugar diabierna 27 di
September di 2 or pa 4 or di merdia na Iglesia Emmanuel,
Grenadaweg 12C y despues lo sali pa Santana na St cruz.

Lastimamente nos no por ricibi bishita di condelencia na cas
despues di entiero.

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Laga tur loka ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur bunita.
Autor: Cado Wever.

Cu profundo tristeza, pero conforme cu Dios su boluntad,
nos ta anuncia fayecimento di nos ser stima:



Rufino S. Tromp
Mihor conoci como "Rufo"
*10-07-1951 – †23-09-2024

Mayornan:
† Guillermo Tromp
† Presentacion Tromp-Frank
Na nomber di su:
Esposa: Amanda Tromp-Tromp
Yiunan:
Mirella Tromp
Melania Tromp
Nirvana Tromp y Michael Curie
Nieto(a) nan:
Xanthe Lobbrecht
Jaedrick Tromp
Rojanny Tromp
Rumannan:
Edwin Tromp y Maria Boot-Tromp y yiunan
† Cesarito Tromp y Carmen Tromp-Zievinger y yiunan
Yvonne Tromp y yiu
† Emmanuel Tromp y Yolanda Tromp-Faro y yiunan
Humphrey Tromp y Lucia Tromp-Tromp y yiunan
Madrina y padrinonan, cuña y suanan, tanta y omonan,
subrino y subrinanan, ihanan, primo y primanan, amigonan,
conocirnan, bisiñanan y ex-coleganan di Occidental.
Demas famia: Tromp, Lobbrecht, Curie, Frank, Klepper,
Figaroa, Maduro, Boot, Lacle, Faro, Zievinger, Medina,
Ridderstaad, Martis.
Nos disculpa si den nos tristeza nos por a lubida algun
miembro di famia.
Preferibel bini bisti na colornan alegre.
Ta invita pa acto di despedida cual lo tuma lugar na Aurora
Funeral Home diabierna 27 di September 2024 di 9'or pa
11'or. Cremacion lo tuma lugar despues den seno familiar.

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

"Señor ta mi
wardador, mi'n tin
falta di nada. Den
cunucu di yerba
berde e ta ponemi
sosega. E ta hibami
na awa tranquil, pa mi
bolbe haña forsa".
Salmo: 23



Genoveva Elizabeth Winklaar
Cariñosamente yama "Baby"
Naci na Curaçao 3 Januari 1940 - Fayece na
Hulanda 19 September 2024
Compañe di bida: Arsenio Eckmeyer (Cheng)
Demás famianan: Bonairo Curaçao Aruba
Hulanda
Acto di entiero lo tuma lugar na Hulanda
diabierna 27 September 10'or pa 11'or na
Uitvaartcentrum Zuid na Fred Roeskestraat #
91, Amsterdam


Aurora Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Y oí una voz del cielo que decía: «Escribe lo siguiente: benditos son los que de ahora en adelante mueran en el Señor. El Espíritu dice: "Sí, ellos son en verdad benditos, porque descansarán de su arduo trabajo, ipues sus buenas acciones los siguen!"»
Apocalipsis 14:13 NTV

Su partida deja un vacío inmenso en nuestros corazonones, pero su legado vivirá por siempre en nuestra memoria.



Javier Kassir

11 marzo 1968 – 22 septiembre 2024

Acto de entiero sera el jueves 26 de septiembre 2024 de 09:00 a 11:00 am en la Funeraria Aurora, siguiendo para el cementerio central en Sabana Basora.

Aurora Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

"No ta nos tur ta muri, pero nos tur lo transforma si, diripiente, den un frega di wowo ora e ultimo trompet zona."
Korintionan 15:51-52

Cu inmenso tristesa den nos curason, pero conforme cu boluntad di Dios, nos ta anuncia fayecimento inespera di:



Pedro Alberto Pardo

*8 augustus 1957 - †24 september 2024

Acto di entiero lo wordo anuncia despues.

A pidi ICC investiga represion contra oposicion Tunez y denuncia abuso di migrante




(AP) - Abogadonan y famianan di lidernan di oposicion na Tunisia a haci yamado na Internacional Criminal Court riba diamars pa investiga represion contra oposicion politico y e abuso di migrantenan Africano den e pais Norte Africano, cual a ser ofreci sosten financiero di Union Europeo pa yuda controla migracion.

Esaki ta marca e di dos biaha cu miembronan di oposicion Tunez a busca un investigacion di ICC. Aña pasa, e famianan di 7 politico deteni a pidi corte investiga acusacionnan di persecucion politico y violacion di derechonan humano di parti di President Kais Saied su administracion.

Abogadonan awo ta bisa cu nan lo entrega un di dos peticion pa un investigacion despues di acusacionnan nobo di abuso di migrantenan y e persecucion di lidernan di oposicion. E peticion ta bini menos di 2 siman prome cu e eleccion di dia 6 di october den cual Saied ta buscando un di dos termino.

"E evidencia nobo ta demostra cu migrantenan Africano ta enfrentando trato brutal y sin escrupulo na man di autoridadnan di Tunisia. ICC tin e hurisdiccion pa investiga e crimennan aki contra humanidad y mester actua cu henter e forsa di ley internacional pa proteha esnan mas vulnerabel," abogado Rodney Dixon a bisa den un declaracion.



"Varios migrante ta reporta experiencianan similar di detencion arbitrario riba tera of na lama despues di expulsion colectivo den regionnan desierto na e frontera cu Algeria y Libya, mientras cu nan ta ser golpia, maltrata y sufriendo di abuso psicologico," el a bisa den su declaracion.

Pa varios Africano Sub-Sahara, kendenan no tin mester di un visa pa biaha bay Tunisia, e pais Norte Africano ta fungi como un prome paso pa yega Europa, mientras otronan ta yega for di Libya, cual ta comparti frontera cu Tunisia.

ICC su oficina di fiscal a confirma den un email cu el a ricibi e peticion.

Corte su fiscalnan ya caba ta investigando e acusacionnan di crimen contra migrantenan na Libya incluyendo detencion arbitrario, asesinato contra di ley,

desaparicion, tortura y violencia sexual y basa riba genero.

Tunisia ta estaod miembro di e corte basa na Den Haag.

Un di e miembronan di famia pidiendo accion di ICC ta Elyes Chaouachi ken su tata, Ghazi Chaouch, ta e ex secretario general di partido politico democratico social Attayar, Ghazi Chaouch.

"Na Tunisia, e pilarnan di democracia y derechonan humano ta bao control, como autocracia, racismo, antisemitismo y mensahenan di odio ta keda aumenta sin control. Nos ta urgi ICC y comunidad internacional para contra esaki, sostiene humanidad, mantene husticia y restaura dignidad. Nos bosnan ta nos libertad y igualdad no mester ser ignora," Chaouachi a bisa den un declaracion publica pa e ekipo legal cu a entrega e peticion na corte.

UE no ta logra disuadi migrantenan Africano a pesar di gasta biyones, segun auditornan

(AP)—E Union Europeo (UE) no ta logra descu-rasha migrantenan for di Africa saliendo pa Europa sin autorizacion y por haci mas pa limita abusonon contra hende purbando di tuma e biahe ey, segun e watchdog financiero di UE a adverti ayera.

E descubrimientonan ta bin den un Corte Europeo di Auditornan den e Fondo Fudiciario di Emergencia pa Africa, un programa estableci na 2015 despues cu mas di 1 miyon migrante a yega riba costanan Europeo, hopi di nan scapando guerra na Siria, poniendo presion riba servicionan na Italia y Grecia.

E meta di e fondo aki ta pa aborda e causa principal di migracion den Africa, manera pobresa, conflicto of desempleo. Prome, 1.8 biyon euro tabata disponible pa distribui riba centenares di proyecto, pero e suma ey a aumenta pa aproximadamente 5 biyon euro awe.

E fondo ta mancha pa e sector ehecutivo di UE, e Comision Europeo. “A pesar di e lesnan siña...e comision ainda no por identifica y reporta e acercamentonan mas eficiente y efectivo pa reduci migracion iregular,” segun auditor principal riba e investigacion, Bettina Jakobsen, a conta reporteronan.



Jakobsen a bisa cu e comision mester “dirigi e ayudo mas amplio den loke en berdad ta urgente y necesario den areanan specifico y paisnan specifico.” Tambe el a bisa cu “e comision no a adresa adecuadamente e riesgonan pa derecho humano, y cu tin puntonan debil den e exactitud y sostenibilidad di e resultadonan reporta.” Ademas, Bruselas, “ta falta proceduranan adecua pa registra y follow up cu e acusacionnan di violacion di derechonan humano.”

E auditornan tabata consciente di 10 agente cu a reporta posible abusonon di derecho na Libia—un di e puntonan principal pa hende desespera

pa purba crusa e Lama Mediterraneo pa Europa—pero e comision solamente tin un registracion di un acusacion.

E auditornan no por a establece si a follow up cu e reportahe. Un investigador apunta pa e Organizacion di Nacionnan Uni a bisa cu e asistencia di UE den e departamento di migracion y Warda Costa na Libia “a yuda y a instiga e comision di e crimenan,” incluyendo crimennan contra humanidad. E comision a rechasa e acusacion.

E auditornan tambe a adverti di erornan envolviendo e uso di fondo- y ekipahenan di UE diseña pa mehora monitorio maritimo y reduci morto riba lama. E Organizacion

Internacional pa Migracion ta calcula cu aproximadamente 30,000 hende a muri of a desaparece purbando di crusa e Mediterraneo desde 2014.

E rapport a bisa cu e “ekipahenan funda pa UE por ser usa pa actornan cu no ta e beneficiarionan original,” of cu staff Libio entrena pa Europeoan “kisas no ta comprometi na e principio di no haci daño.” Beneficiarionan di e fondonan tambe por nega pa permiti monitornan controla con nan ta usa e placa.

Na december, e auditornan a bishita e sitio di un centro di coordinacion di rescate maritimo riba e costa Libio. Italia a haya tarea na 2017 pa yuda e Libionan establece esaki.

A aloca miyones di euro pa e tarea y a manda container di ekipahe, pero shete aña despues, ainda e no ta operacional.

Bao reglanan internacional gobernando e seguridad di bida riba lama—reglanan cu ta reconoci y acepta pa UE—Libia mester tin un centro asina y staff permanente den dje. Mientras tanto, Italia a coordina e esfuersonan mas tanto den e awanan di Libia, dicidiendo cual barco mester responde na emergencianan.

E comision, na su parti, e acepta e recomendacionnan di e rapport riba con pa mehora cos. El a reconoce “cu tin un necesidad pa sigui reenforza su capacidad pa identifica y mitiga riesgonan, incluyendo por medio di defini actividadnan specifico of produci indicadornan den sectornan di riesgo halto pa derecho humano. Esaki lo ser adresa por medio di duna mas material y entrenamiento di guia sectoral.”

E comision a subraya cu, desde aña pasa, e fondo a yuda manda 73,215 migrante boluntariamente back na nan pais. Den e prome mita di 2023, el a bisa, a crea of a aporta 11,087 trabao, mas tanto na Guinea y Senegal, mientras cu 23,266 hende a ricibi entrenamiento di habilidad.

Zelensky ta adverti contra intentonan di China y Brasil pa impone un plan di paz nobo

(EFE) - Presidente di Ucrania, Volodymyr Zelensky, a adverti ayera di aranson contra loke el a yama “e duo di China y Brasil” pa purba promove “algo alternativo na un paz husto y completo” pa caba cu e guerra den nan pais y diferente di e formula cu e mes a propone dos aña pasa.

Den su discurso den Asamblea General di Nacionnan Uni, Zelensky a bisa cu e dos pais aki tambe ta purba di “reuni un coro di voz, tambe algun na Europa y otro na Africa” pa promove e plannan alternativo aki, pero nan ta sirbi solamente “pa duna (Vladimir) Putin espacio politico pa sigui cu e guerra.”

Pero el a recorda tur dos pais:



“Bo no por aumenta bo poder pa perhudica Ucrania.”

Tabata kere cu Zelensky lo a trece na ONU un plan nobo pa caba cu e guerra, cu awor tin dos aña bieu, pero ni diamars dilanti Consejo di Seguridad ni ayera dilanti Asamblea el a sali for di su

guion di su formula di paz delinea dos aña pasa y esey awor ta parce stanca.

Zelensky a corda cu Rusia “ta un pais binti biaha mas grandi cu Ucrania y toch e kier mas tereno,” pues logicamente “tur hende na Europa y Asia Central ta sinti cu e guerra por

yega na nan tambe.”

Gran parti di e discurso di Zelensky a consisti di advertencia tocante e riesgonan cu Ucrania ta enfrente den winter debi na e atakenan di Rusia riba su plantanan di energia: “Awe, Rusia a destrui tur nos plantanan termal y un gran parti di nos capacidad hidroelectrico, el a sigura.

“Asina ta con Putin ta prepara nos pa winter, sperando di tormenta miyones di Ucrani-ano, famianan comun, hende muhe, mucha, pueblonan normal, ciudadnan normal. “Putin kier laga nan den scuridad y den friu e winter aki, forsando asina Ucrania pa entrega”, el a señala, prome cu adverti riba e peliger pa henter mundo cu menasa pa e plantanan nuclear di e pais

ta representa.

Ayer den Consejo di Seguridad, Zelensky a bisa cu e tin informacion preciso cu Rusia tin planea pa pronto ataca tres planta nuclear di Ucrania, aunke e no a specifica cua.

Zelensky a bisa cu el a traha un plan di victoria nobo den e guerra di casi tres aña aki basa riba e principionan y balornan di e Carta di Nacionnan Uni, pero no a duna otro detaye cu no ta organisa un conferencia di paz. El a agrega cu e lo invita tur pais na e conferencia, incluyendo China, e partner mas poderoso di Rusia, y India, cu a bisa cu e ta un actor neutral den e guerra pero ta yudando na apoya e economia di Rusia cu compranan grandi di petroleo.

Florida bao di estado di emergencia pa motibo di posibel horcan grandi

(DW) - E poblacionnan di Florida na costa di Golfo di Mexico tabata den estado di emergencia diamars ultimo y a dedica nan mes na preparacion pa yegada di ciclon Helene, cu ta anticipa pa yega na e estado aki na sur di Merca como un horcan grandi awe diahuebs.

Di e total di 67 condado cu Florida tin, 61 ta bao di un estado di emergencia decreta pa e gobernador di e estado, Ron DeSantis, kende den un conferencia di prensa a pidi na e poblacion pa tuma e precaucionnan necesario y pa evacua den caso di esnan cu ta biba na areanan di riesgo.

“Tin un riesgo significant di marea di tormenta, inundacion y erosion na costa, precipitacion pisa, inundacion repentino, y bientonan dañino” na costa di Golfo, e



orden ehecutivo cu DeSantis a firma ta bisa.

Tormenta tropical Helene, cu ta situa den Caribe, ta bay intensifica rapidamente na momento di su paso den awanan di Golfo di Mexico, segun a indica Centro Nacional di Horcan (NHC).

NHC a adverti cu Helene lo tin un fortalecimiento rapido y “continuo”, y ta pronostica cu den 48 ora e lo bira un horcan di categoria 3 riba e escala di Saffir-Simpson (for di un maximo di cinco), hustamente ora e ta na mas o me-

nos yegando tera na Florida.

Den e condadonan di Hillsborough, Pinellas y Pasco, pa menciona algun, scol a ser suspendi pa ayera y awe pa motibo di e tormenta tropical, cu diamars tabatin bientonan maximo sosteni di 75 kilometer pa ora.

Helene, ta e di nuebe ciclon tropical den e actual temporada di horcan Atlantico, y e di ocho nombra, cu diamars atardi tabata situa mas o menos 280 kilometer zuid di e punta west di Cuba, y ta spera cu e lo move riba e awanan

cayente di Golfo di Mexico, cu lo sirbi como combustibel pa bira mas intenso.

Segun e vocero di Cas Blanco, Jeremy Edwards, presidente di Merca Joe Biden ta na altura di e trayectoria di Helene, cu un bes e yega tera na Florida lo afecta Georgia, Alabama y Tennessee, pa e motibo ey a ordena e movimiento di personal di emergencia y tambe e envio di generadornan di coriente, cuminda y awa potabel.

Gobernador DeSantis a confirma cu tin te cu 3,000 miembro di Guardia Nacional di Florida cla pa yuda den areanan afecta pa Helene.

Medionan local a muestra

imagennan di residentenan cu ta recoge saco di santo y ta informa cu hende ta cuminsa evacua. Hospital General di Tampa a lanta un barera di te cu tres meter como un medida di proteccion contra inundacionnan previsibel, segun ABC.

Di acuerdo cu pronosticonan di NHC, e sistema por yega tera den noordoost di Florida, den e area conoci como Big Bend, hustamente caminda horcan Debby di categoria 1 a yega tera na augustus ultimo.

Si pronosticonan keda confirma, Helene lo ta e horcan di mas grandi cu a asota Merca den mas cu un año.

Noruega ta detene un ciudadano Aleman sospecha di stimula crimennan contra humanidad na Camerun

(AP)—Polis Noruego a bisa ayera cu nan a detene un ciudadano Aleman di descendencia Camerunes pa supuestamente stimula crimennan contra humanidad na Camerun, e prome biaha cu Noruega tabata embarcando riba proceduranan legal pa crimennan asina.

E homber, ken ta den su 50 añanan, a biba na Noruega pero no a ser nombra. A deten’e pasobra e Servicio Nacional di Investigacion Criminal, conoci na Noruega como KRIPOS, a bisa cu nan ta kere e “tabatin un rol central den un conflicto arma andando na Camerun.”

Anette Berger, e fiscal den e caso, a bisa, “Nos ta den un fase trempan di e investigacion, y tin varios stap di investigacion cu falta.”

Ayera KRIPOS a busca pa su costudia for di e Corte di Distrito na Oslo “riba e fondo di riesgo di manipulacion cu evidencia.”

Durante e ultimo shete añanan, un conflicto arma prolonga conoci como e crisis Anglofono a afecta comunidanan den e dos regionnan di habla Ingles di e pais—oficialmente yama Northwest y Southwest—mientras separatistanan



ta bringa cu forsan di gobierno.

Despues di un abordamento riba protestanan pasivo na 2016, gruponan rebelde arma a mobilisa y a priminti pa bringa pa e independencia di e areanan Anglofono, cual nan ta yama Ambazonia.

E conflicto cu e ehercito Camerunes a laga mas cu 6,000 hende morto y a desplasa 760,000 otro, segun e Grupo Internacional di Crisis. E gruponan rebelde, como tambe e ehercito y polis, a ser acusa di comete abuso y crimennan contra e ciudadanonan.

Aruba Bank ta anuncia su patrocinio pa e seminario di “Happy Parents, Happy Children” Co-Parenting



Aruba Bank ta contento di patronica e seminario “Happy Parents, Happy Children” (HPHC), cu lo enfoka riba duna poder na mayornan cu strategianan di co-parenting efectivo.

E evento aki ta programa pa tuma lugar diasabra, 2 di november 2024, na Occasions Ballroom, y ta alinea cu e compromiso di Aruba Bank pa bienestar di comunidad y desaroyo di muchanan.

Durante un conferencia di prensa, Stephanie Camacho, Sr. Marketing Officer, a subraya e dedicacion di Aruba Bank pa duna sosten na



e iniciativanan cu ta promove un ambiente familiar saludabel y cu ta contribui na e bienestar general di e proximo generacionnan.

Como e banco cu ta enfoka riba e comunidad, Aruba Bank ta honra pa forma parti di un iniciativa tan significativo. Nos ta reconoce e importancia di yuda famianan desaroya un relacion di “co-parenting” mas fuerte, y nos ta ansioso pa wak e impacto positivo cu e seminario lo tin riba mayornan y nan yuinan.

E seminario, organisa pa Piso 3 en conexion cu Dia Internacional di Muchanan, lo tin charlanan di expertonan, incluyendo terapeutanan di famia, profesionalnan legal, y coachnan manera Nancy Gravenstijn, Johnny Boekhoudt y Laura Tromp.

Lo cubri aspecto importante di “co-parenting”, manera comunicacion efectivo, maneho di emocion, y creacion di plannan di consistencia, cu ta enfoka pa duna sosten na mayornan.

Pa mas informacion pa sigura bo entrada, por manda un WhatsApp na number: +297 594-0297.